



續古文苑

五

~#d6
1.200
5



門八 16
稀
卷



續古文苑卷第十四
賜進士及第授通奉大夫山東通省督糧道加三級孫星衍撰

箴

邊都尉箴

漢 胡 廣

巍巍上聖光被八垠矧惟內面罔不來賓季末陵遲
王澤壅隔戎狄作難鬼方騷述桓桓猛將是攘是闢
殷宗周宣用顯其績大漢龍興念存治平蕩蕩率土
來同門屏守撫其民尉典其戎五才並用文武程功

陵令箴

漢 胡 廣

昔在黃葉葬野衣薪口禮極哀不樹不墳瓦棺望周
虞夏攸稱壤不毀膚賄不害生是蹈皇極百王此經

續古文苑卷第十四

故厚不可始皇薄不可王孫案舊脫孫字今補乃眷西顧爰

太醫令箴

漢崔寔

動不肆勤靜不宴逸有疾歸天醫無能恤晉平好內
四時是一非鬼非食惑以自失雖有秦和焉所施術
太上防疾其次萌牙腠理不蠲骨髓奈何

女師箴

漢皇甫規

觀象制教肇經乾坤家有王義室有嚴君各有定位
陰陽是分昔在軒轅陶化正刑此句有詳刑於壺闈以
臨百官煌煌后妃元統是閑穆穆夫人爰采潔繁師
禮莫違而神罔時怨關雎首化萬國承流實有淑女

允作好述唐媛與媯文母盛周案母善誤武今改德音不回
安濟大繇咨爾庶妃鑿輅斯邁戰戰兢兢厲省鞶帶
漸進不形變起無外行難著而易喪事易失而難追
動若順流應如發機奉上惟敬撫下惟慈怨豈在明
患生不思

皇后箴

漢傅幹

煌煌四星著天垂曜赫赫后妃是則是效舜納二女
對揚茂教正位於內頑嚚輟暴案暴舊誤恭今正辛亂妲已
共則情悅此句有詳牝雞亂晨殷祀用絕孝成寬柔縱
施紀綱王擅朝權趙專椒房巨猾是緣竊弄神器故
禍不出所憎常出所愛是以在昔明后案昔舊誤晉今正日

新其化匪唯訓外亦訓於內

太子少傅箴

晉傅

元

夫金木無常方員應形亦有隱括習以性成故近墨者黑案故下當脫四字一句聲和則響清形正則影直正人在側德義盈堂鮑肆先入蘭蕙不芳傅臣司訓敢告君王

女史箴

晉裴

頴

膏不厭鮮水不厭清玉不厭潔蘭不厭馨爾形信直影亦不曲爾聲信清響亦不濁綠衣雖多無貴於色邪徑雖利無尚於直春華雖美期於秋實冰璧雖澤期於見日浴者振衣沐者彈冠人知正服莫知行端

服美動目行美動神天道祐順常與吉人

幽人箴

晉庾

敳

有物混成先天地生乃剖乃判二儀既分高卑以陳貴賤攸位榮辱相換案以上五句乾道尚謙人神同符危由忽安溢綠飾虛苟識妙膏厥美有腴韓信耽齊殞首鐘室子房辭留高迹卓逸實不足榮利不足希華繁則零樂極則悲歸數明白勢豈容違人徒知所以進而忘所以退穰侯安寵襄公失愛始乘夷道終嬰其類羲和升而就翳望舒滿而就虧盈挹之分自然之規悠悠庶人如何勿疑幽人守虛仰鑽元遠敢草斯箴敬咨黷冕

太子侍臣箴

晉 温 嶠

勿謂其微，覆篲成高。勿謂其細，巨由織毫。故曰善不積，不足以成名。話言如絲，而萬里來享。元以處極，而利在永貞。案元舊誤無今改是以太子之在東宮，均士抗禮，以甲厥情，入學齊齒。言稱先生，不以賢自臧。不以貴為榮，思有虞之蒸蒸。尊周文之翼翼，晨昏靡違。夙興宴息，師傅是瞻。正人在側，屏彼佞諛。納此亮直，故傳敬德義。臣思盡忠，或稽古訓導。惟道之不融，或造膝詭辭。懼咎之蘊，崇惴惴兢兢。思二雅之遺風，鑒乎九三。天祿永終，近臣司規。敢告常從。

逸民箴

晉 江 道

至人應務，是統是營。乃制上下，以收羣生。君位孰在，匪聖伊明。賢愚相奉，臣主以成。如彼百節，各役天形。率分委質，仰應一情。心膂有位，股肱有經。豈以處下為戚，為榮。案為榮當脫二字各安其所，舉體用乎。夫設爵列士，懸弓垂旌。卑尊之級，貴賤之名。匪以恣物之欲，實大猷而是經。處遁之士，奚眷於時。行矣先覺，捐俗長辭。明乎憂患，故超爾不疑。解髮靈崖，被褐絃絲。飄飄臺上，輕舉高之。穆穆二仲，攜策相期。盤幽隱寂，與物無治。凡厥後來，順乃所往。鑒茲俗累，戒於顛蕩。無殉外物，心煩技養。無弃恬曠，憂勤是掌。林人司箴，敢進善黨。

冠子箴

梁蕭子範

是月惟令敬擇良辰式遵士典諮筮於賓嘉字爰錫
醮酒方陳禮莊爾質德成爾身永變童心長移悼齒
朱錦辭髮青紉在履丹石為操冰泉厲已務簡朋匹
田蘇遊止在我尚謙推物盡美面諂退言弗納於耳
直弦矢辭斯為良士

銘

王史威長銘

漢西都時南宮寢殿內有醇儒王史威長死葬銘曰
明明哲士知存知亡崇隴原豐非^靈非康不封不樹
作靈乘光厥銘何依王史威長

扇銘

漢傅毅

翩翩素圓清風載揚君子玉體賴以^靈康冬則龍潛
夏則鳳舉知進能退隨時出處

戟銘

漢李尤

枝戟之設^{案枝舊誤}以戒非常秉執操持邪暴是防
須臾之忿^{案忿舊誤}終身為殃山陵之禍起於毫芒
張溥輯李尤集獨
缺此銘故錄之

崕溪銘

漢張休

太山雖高無得而擬劍道雖險孰可為比吁嗟此山
高且險只上眡彼蒼相去能幾宜乎昆侖日月所蔽
行人過茲鮮不歎涕深念於斯刊銘崕溪

漢延熹二年三月初

續前十四

張休

五

劍銘

漢士孫瑞

臣有劍一枚駿羣標首藍田玉乞以備乏信給用左

右也

見北堂書鈔一百二十
二當是序故補入於此

天生五才金德惟剛從革作辛含景吐商辨物利用

勳伐彌彰暨彼良工歐冶干將爰造寶劍巨闕墨陽

上通皓靈太平御覽三百四
十四引上作精獲茲休祥剖山竭川虹

蜺消亡昭威耀武震動遐荒楚以定霸越以取強

漢鏡銘

絜精白而事君怨陰驩同之弇明煥元錫之流澤志
疏遠而日忘慎康美之窮嗤外丞驩之可欲說慕安

於重泉願永思而母紀內請碩以昭明光輝桌夫日

月心忽揚而願忠然壅塞而不池右鏡銘內外層合
七十二字錢氏姑

釋詩碩為清妍借硯為之或然釋壅為
壁則說釋池為施是也其文體似楚騷

又

日有熹月有富樂無事常得意美人會竽瑟侍商面字

市程萬物平老復丁復生盛

又

久不見侍前希秋風起予志悲

又

湛若止水皎如秋日清暉內融菱花外發洞照心臆

屏除娛孽永世作珍服之無沫

又
尚方御竟大母傷巧工刻之成文章左龍右虎辟不祥朱鳥元武順陰陽子孫備具居中央涑治銀錫清而明長保二親樂富昌壽敝金石如侯王

又

許氏作竟自有紀青龍白虎居左右聖人周公魯孔子作吏高遷車生耳郡舉孝廉州博士少不努力老乃悔吉

又

天地成日月明五嶽靈四瀆清十二精八卦貞富貴盈子孫盛皆賢英福祿并

座右銘

魏卞蘭

重階連棟必濁汝真金寶滿室將亂汝神厚味來殃艷色危身求高反墜務厚更貧閉情塞欲老氏所珍周廟之銘仲尼是遵審慎汝口戒無失人從容順時和光同塵無謂冥漠人不汝聞無謂幽昏處獨若羣不為福先不與禍鄰守元執素無亂大倫常若臨深終始為純

斫猛獸刀銘

魏何晏

徒搏不兵作戒宣丘用造斯器螭獸是劉制禽允良昏明亶時永釐厥後蠲民之災太平御覽三百四十六此下有注云言作

斬虎刀銘曰螭虎是劉案注謂唐人改虎字為獸耳

筆銘

魏傅 異

昔在上古結繩而治降及後載易以書契書契之興
與白頡皇肇建一體浸遂繁昌彌綸羣事通遠達幽
垂訓紀典匪筆靡脩實為心畫案畫舊誤臧否斯由
厥美宏大置類鮮疇德興之著唯道是揚苟逞其違
禍亦無方案隋書經籍志梁有尚書傳異集二卷亡藝文類聚異作選誤也今改正

燭銘

晉傅 元

煌煌丹燭焰焰飛光取則龍景擬象扶桑昭彼元夜
炳若朝陽焚形監此無隱不彰此銘張溥傳元集不載

反金人銘

晉孫 楚

晉太廟左階之前有石人焉大張其口而書其曾曰

我古之多言人也無少言無少事少言少事則後生
何述焉我讀三墳五典八索九丘曠罔深而不探理
無與而不鉤故言滿天下而無口尤夫唯言立乃可
長久胡為塊然生緘其口自拘廣庭終身已上俱依
太平御覽凡夫貪財烈士殉名盜跖為濁夷柳為清
鮑肆為臭蘭圃為馨莫貴澄清莫賤滓穢二者言異
歸於一會堯懸諫鼓舜立謗木聽采風謠惟日不足
道潤羣生化隆比屋末葉陵遲禮教彌衰承旨則順
忤意則違時好細腰宮中皆飢時悅廣額下作細眉
逆龍之鱗必陷斯機括囊無咎乃免誅夷顛覆厥德
可為傷悲斯可用戒無妄之時假說周廟於言為蚩

是以君子追而正之

已上依藝文類聚十九張薄
輯楚集失采御覽今補之

塵尾銘

晉王導

道無常貴所適惟理勿謂質卑御於君子拂穢清暑
虛心以俟

黑塵尾銘

晉許詢

卑尊有宗貴賤無始器以通顯廢興非已偉質軟蔚
岑條疏理體隨手運散飈清起通彼元詠申我先子

白塵尾銘

晉許詢

蔚蔚秀氣偉我奇姿荏弱軟潤雲散雪霏君子運之
探元理微因通無遠廢興可師

諸葛武侯宅銘

晉習鑿齒

達人作振此頽風彫薄蔚采鴟闌初學記惟豐義
作竭瀾范蒼生道格時雄自昔爰止於焉盤桓初學記龍盤躬耕
作龍盤躬耕西畝永嘯東巒迹逸中林神凝巖端罔窺其奧誰測
斯歡堂堂偉匠婉翻陽朝傾巖搜寶高羅九霄慶雲
集矣鸞駕三招案三字依初學記廿四
改藝文類聚作亦非

隱几銘

晉蘇彥

良匠造器妙巧應規俯仰灼照商畧神奇假物與思
須以忘疲隋書經籍志梁有晉北中
郎參軍蘇彥集十卷亡

邛竹杖銘

晉蘇彥

安不忘危任在所杖秀矣雲竹勁直條暢節高質貞
霜雪彌亮北堂書鈔一百二十三
貞作固霜雪作負霜圓以應物直以居

續文獻通考

九

當妙巧無功奇不待匠君子是扶道遙神王

木弓銘

晉嵇含

烏號之朴豐條足理弦鳴走括截飛駭止射隼高墻
出有議擬既用禦侮亦以招士

團扇銘

宋孫康

有圓者扇誕此秀儀晞露濯色擬日定規朗姿玉暢
惠氣蘭披隋書經籍志梁有宋征南長史孫康集十卷七

齊海陵王墓銘

齊謝朓

中樞誕聖膺憲受命於穆二祖案高帝武帝也天臨海鏡顯
允世宗案文惠太子也温文著性三善有聲四國無競嗣德
方衰案鬱林王也時惟介弟景祚云及多難攸啓載驟載

獵高闢代邸庶辟欣欣威儀濟濟亦既負辰言觀帝
則正位恭己臨朝淵嘿虔思寶締負荷非克敬順天
人高遜明德案明帝也西光已謝東旭又良龍蠶夕儼葆
挽晨鏘風搖草色日照松光春秋非我晚夜何長中
書侍郎謝朓撰此文朓集不載

鼎銘

梁周捨

天下憲康異方同軌九牧作貢百司咸理範金鑄器
式鎮階祀波圓月鏡傳之無已

洛橋銘

後魏常景

浩浩大川泱泱清洛道源熊耳控流巨壑納穀吐伊
貫周淹毫近達河宗遠朝海若兆惟洛食實曰土中

上映張柳下據河嵩寒暑攸叶日月載融帝世光宅
函夏同風前臨少室却負太行制巖東邑峭岷西疆
四嶮之地六達之莊恃德則固失道則亡詳觀古昔
列見丘墳乃禪乃革或質或文周餘九裂漢季三分
魏風衰晚晉景彫曠天地發輝圖書受命皇建有極
神功無競魏錄仰天元符握鏡聖運會昌龍圖受命
案此二句衍也因乃各本皆有姑仍之乃卷書軌永懷保定敷茲景跡流
美宏模襲我冠冕正我神樞水陸兼會周鄭交衢爰
勒洛汭敢告中區

石門銘

此門蓋漢永平中所穿將五百載世代綿迴屯夷邁

作乍開乍閉通塞不恒自晉氏南遷斯路廢矣其崖
岸崩淪礪閣堙禡門南北各數里車馬不通者久之
攀蘿捫葛然後可至皇魏正始元年漢中獻地哀斜
始開至於門北一里西上鑿山為道峭岨槃迂九折
無以加經途巨礙行者苦之梁秦初附實仗才賢朝
難其人衰簡良牧三年詔假節龍驤將軍督梁秦諸
軍事梁秦二州刺史秦山羊祉建旗嶠漾撫境綏邊
蓋有叔子之風焉以天嶮難升轉輸難阻表求自迴
車已開創舊路釋嶺磴之勞就方軌之逸詔遣左
校令賈三德領一人共成其事三德
巧思機發精解冥會雖元凱之梁河德衡之損躡未

足偶其奇起四年十月十日訖永平二年正月畢功
閣廣四丈路廣六丈皆填礮棧豁碎嶮梁自迴車
至谷口二百餘里連輶駢轡而進往哲所不工前賢
所輟思莫不夷通焉王生履之可無臨深之歎葛氏
若存幸息木牛之勞於是畜產鹽鐵之利統錦蜀甦
之饒充仞川內四民富實百姓息肩壯矣自非思埒
班爾等等張蔡忠公忘私何能成其事哉乃作銘曰
龍門斯鑿大禹所彰茲巖廼穴肇自漢皇導此中國
以宣四方其功伊何既逸且康去深去阻匪閣匪梁
西帶汧隴東控樊襄河山雖嶮惟德是強昔惟畿甸
今則關疆永懷在人亡不逢殊績何用再光

水眺悠口林望幽長夕凝曉露晝含曙霜秋風夏起
寒鳥春傷穹窿高閣有車麟麟威夷石道駟牡其駟
千載絕軌百兩更新敢刊巖曲以紀鴻塵魏永
平二年太歲己丑正月己卯朔卅日戊申梁秦典籤
太原郡王遠書

西壁文後漢永平中開石門今大魏改正始五年爲
永平元年餘功至二年正月訖手開復之年同日永
平今古同前極矣哉後之君子異世同聞焉

天柱山銘

後魏鄭道昭

孤峯秀峙高冠霄星實曰天柱鎮帶萊城懸崖萬仞
峻極霞亭據日開月麗景流精朝暉岩室夕曜松青

九仙儀彩餘用栖形龍遊鳳集斯處斯寧淵繇窮想
照燭空溟道暢時乘（睡）光幽明雲門煙石登之長生

天柱山銘

北齊 鄭述祖

巖巖岱宗魯邦仍其致祀奕奕梁山韓國以之作鎮
蓋由拳石吐雲扶寸布雨五岳三望六宗九獻祈禱
斯應禮秩攸明天柱山者卽魏故通直散騎常侍中
書侍郎國子祭酒秘書監青光相三州刺史先君文
恭公之所題目南臨巨海北眺滄溟西帶長河東瞻
大壑斜嶺槩天層峯隱日尋十州於掌內總六合於
眼中文鯁自此經停精衛因其止息始皇遊而忘返
武帝過以樂留豈直蛾眉鳥翅二別兩嶠對談小太

共敘優劣者也公稟氣辰象含靈川嶽禮義以成規
矩仁智用爲樞機自結衣逞譽革履傳聲組綬相輝
貂冕交映至於愛仙樂道之風孝敬仁慈之德張良
崔廓未之云擬文先夏甫何以能加魏永平三年朝
議以此州俗關南楚境号東秦田單奮武之鄉麗其
騁辯之地民猷鄙薄風物陵遲謔諮俾乂非公勿許
及駟雞御下享魚理務羣情款密庶類允諧變此澆
夷之俗侔彼禮樂之邦懋績布在哥誥鴻範宣諸史
策公久闊枌榆永懷桑梓同昇隴而灑泣類陟岵以
興嗟於此東峯之陽仰述皇祖魏故中書令秘書監
兗州刺史文貞公迹狀鐫碑一首峯之東堪石室之

內複製其銘余忝資舊德力構前基遂秉笏朝門策
名天府出入蕃邸陪從帷幄凡諸身歷瀛趙滄莫懷
及充光行正十州刺史北豫州大中正三登常伯再
履納言光祿大常頰居其任揣究庸虛無階至此直
是遺薪妄委餘慶濫鍾何曾不想樹嗟風瞻天愧日
猥當今授踵迹此蕃敢慕楹書仰宣庭誨其詞曰
嵩高峻極太華峭成祈望諸素禋禱羣經崇哉天柱
迴出孤亭地險櫛德藉此為名赫矣先公道深義富
如桂之馨如蘭之茂尊祖愛親存交賞舊翻屬愚淺
實慚穿構大齊天統元年歲次乙酉五月壬午
朔十八日己亥刊使持節都督光州諸軍事車騎大

將軍

儀同三司光州刺史熒陽鄭述祖作

吳郡橫山頂舍利靈塔銘

隋嚴德盛

竊以至理無言非言無以寄理元蹤無體非體無以
明蹤然則八十種好呈應身之妙三十二相表化質
之妍至如獻土童兒聚沙稚子尚獲無窮之報猶成
莫盡之因況撒身命重財崇諸聖業者矣但樹因之
最無過起塔崇福之重詎甚建幢而銀青光祿大夫
吳郡太守李顯者乃華陽杞梓江漢芳蘭夙布素誠
少匡王國吐納風雷之際出處朱紫之庭縻爵峻於
其身隆基茂於往葉温良洽於郡國孝友睦於閨門
建節贊治張振化風門雖望族世載公卿安仁樂智

之心無違終食謙明惠厚之德造次必存仍共獎勸
郡部官人奉為皇帝皇后齊王六宮眷屬各捨七珍
同崇八福在郡城之西山頂上營造七層之寶塔以
九舍利置其中金瓶外重石槨周護留諸弗朽遇劫
火而不燒守諸不移漂劫水而不易時有龍華道場
比丘法首者歲居齟齬即起踰城之心年將志學仍
持航海之操自離親捨俗三十許年洞識苦空明閑
法要誠心內發冥夢外酬時聞此山為古之佛殿乃
共於此所成斯勝業願寶鐸常搖法輪恒轉含生迴
向□□歸心上通有頂之天傍及無邊之地同離生
死之苦俱成涅槃之樂其辭曰

相焉是滅法矣非生蓋纏虛萃渴愛徒盈不無不有
何體何名業風既息法水便清以茲勝地令德來持
功施合矩化動成規如雲出岫狀月臨池清流不倦
貽銘無疲虔心局體同歸共慕施彼七珍崇斯六度
下被羣品上資天祚萬福莊嚴千靈輔護少宣令問
彼秀苗藂案藂舊誤聚今改輪轉三有馳流六通獨善非德
兼濟為功俱成法雨用息塵籠
大隋大業四年
歲次戊辰九月辛未朔八日戊寅立銘吳戶嚴
德盛製文司倉魏瑗書吳郡志云寶積寺在橫山下亦名楞伽寺山頂有塔隋人所書塔銘碑石全好案今已不存矣

萬年宮銘

唐高宗

續苑十四
朕聞金臺遠遊超忽崑閬之間玉闕參差綿邈蓬瀛
之際是以周王肆轍唯招既往之僊漢帝遐遊空益
將來之弊豈如岐陽峻鼻鎮茲京甸疏林光之別館
建甘泉之離宮東望翦華千林結影西瞻隴坂派水
分流南俯茶原風雲交映北臨石柱川朝宗迴迴
孤岑秀三襲於霞表斜斜危路環九折於雲心複澗
澄陰扇炎風而變冷重巒潛暑韜夏景而飈寒故知
五鎮之基空号神州之地三仙之嶺虛傳靈府之都
未若翦石裁宮構飛檐於迴漢騰虛架宇聳紫殿於
遙空百仞朱樓月盈虧於青瑛千尋翠閣雲舒卷於
丹墀岫綴霞衣點虹梁而散錦巖懸溜帶瀆石砌而

飛珠浮涼氣於彤闈庭留花而雪夏凝清陰於碧沼
池結鏡而冰春泉起花岑雙蓮而吐秀波搖錦石
皎雨鏡而騰暉幾片斷雲縈松合蓋數藜幽桂插月
分香暝壑栖煙籠千崖而散碧朝原上日輝四野而
舒紅笑樹餘花低空落影吟風宿鳥響谷雙驕猿不
恨而虛啼蝶無癡而起舞朕載懷千古流鑒百王思
欲屏逸收驕怡神遣慮崆峒訪道欽往哲之高風姑
射尋真挹先賢之宿志所以停軒禁藥駐蹕榆川非
欲賞恣盤遊途窮轍迹加以時侵首夏日餘春露
泣脩篁風清遂澗松蘿雲起藤蔦星懸可以陶瑩心
靈澄清耳目鏡冰霜則廉潔斯在撫松筠則貞操非

遙昔姬后西征，猶刊弁石。秦皇東指，尚勒稽峯。勝地淹留，何必華胥之國。蕭然物外，不假元圃之阿。故以劭美千齡，騰徽萬古。景其前躅，爰紀茲地。其銘曰：靈山作鎮，挺秀岐陽。遠圖天柱，迴儷瑤房。鸞驕淑氣，花泛韶光。樹含冬霰，巖留夏霜。構宇重巘，栽基疊岫。石砌披錦，山窓點繡。佩小蘭新，峯殘蓮舊。雪徑常花，冰溪恒晝。標途天外，聳闕雲端。煙霾邃谷，霧宿危巒。徑湍彤闈，潛暑翠幌。凝寒憩駕，離宮淹留。禁苑柳初眉細，潭深鏡遠。蓋逐雲穿，苔隨溜卷。葉冷惟秋，莊濃若晚。泉飛嶺腹，景鏤巖心。霞疏錦薄，草密袍深。露荷傾玉，風螢散金。檐空鷓靜，山昏日沈。

丘壑怡神，林篁賞性。千里眺覽，八州澄鏡。玉燭調序，薰琴動詠。仰則茨山，刊規遠暎。大唐永徽五年歲次甲寅三月景午朔十五日庚申建。

唐西明寺鐘銘

維大唐麟德二年歲躔星紀，月次降婁。二月癸酉朔八日庚辰，皇太子奉為二聖於西明寺造銅鐘一口。可一萬斤，發漢水之奇珍，採蜀山之秘寶。虞倕練火，晉曠飛鑪，帶龍虛而騰規，應鯨桴而寫製。聲流九地，遐宣厚載之恩，韻徹三天，遠播曾曼之德。寤羣生於覺路，警庶類於迷塗。業擅香垣，功齊塵劫。式旌高躅，敢勒貞金，頌其銘曰。

青祇薦祉黃離降精。渴川毓德。瑤嶺飛英。吹銅表性。問寢登情。興言淨業。載啓香城。七珍交鑄。九乳圖形。翔龍若動。偃獸疑驚。制陵周室。規踰漢庭。風飄旦響。霜傳夜鳴。仰延皇祚。俯導蒼生。聲騰億劫。慶溢千齡。

姚元景造象銘

竊惟大雄利見。宏濟無邊。眞諦克明。神通自在。是以三千世界。禪河注而不竭。百億須彌。甘露灑而恒滿。歸依妙理。無乃可乎。朝散大夫行司農寺丞姚元景。慈悲道長。忍辱心遐。悟朱紱之儻來。沿紺池而利往。發願上下平安。爰於光宅寺法堂石柱。造像一鋪。爾其篆刻彰施。儀形圓滿。眞容湛匿。坐青石而披蓮法。

柱承而排紺霄。而舞鶴雲。開朗金光。炳然風塵晦冥。玉色逾潔。身不可垢。道必常明。宴坐經行。善矣。俾我潘輿。盡敬將法輪。而恒轉。姜被承歡。曳天衣而下拂。崑丘燎火。還披鷲嶺之雲。寶劫成塵。蕭滌龍宮之水。迺爲銘曰。

法無上兮神化昌。流妙字兮爍容光。弥億齡兮慶未央。長安四季九區十八書。

晉史憲銘

唐史 疑

伊昔有熊。道德資始。名列五帝。澤流千祀。文捨伯邑。武興太史。官有世功。春秋所紀。衛尉疇嗣。孝成以康。將軍樹績。光武其昌。事列盟府。功書太常。源分陸海。

派別三江懿彼侍中飛纓殿內爲王之伯熙帝之載
左貂右蟬切問近對八舍攸履七車不味散騎帝友
朝夕進規奉輿肅事贊道攸宜有濟之論兼濬之儀
獻替之美復在於斯桓桓積石允文允武外擅爪牙
內爲心膂氣逸南仲才高召虎作師之貞爰誓其旅
豫章太守人之領袖如玉之貞如松之茂共理天下
實資時秀良二千石抑非虛授惟君挺生材術縱橫
黃裳元吉白賁永貞荆巖植潤漢水騰明是謂家寶
膺茲國楨英英學藝爲郎滿歲紫帳趨榮青練沐惠
王譚練習鄭泰才計持實有章大猷無替悠悠廣熙
南海之湄言典斯郡遠予將之變其風俗鎮以宣慈

紀列十四

碑

人斯攸賴吏不忍欺列郡之政茲焉爲盛開國承家
大君有命山川光錫圭組輝映是曰懋功往哉惟敬
重此台望期諸棟隆初欣鄭鹿奄歎虞鴻麟傷孔子
馬思滕公死而可作善始令終言式其墓岷山之路
如斧載形廣輪爲度委鬱松楸蒼芳草露萬古同悲
千春罷曙猗歎雲九世豈乏賢不忘其本願述其先
陸家茂德潘氏流泉口聲懿範日月俱懸案建康志
考益云晉
書憲爲尚書山陰侯史疑撰神道碑唐景龍四年作
其碑字多磨滅是周應合所見銘文尚可讀今則亡
其石矣錄載銘中取與王
史威長海陵王一例也

景龍觀鐘銘

原夫一氣凝真含紫虛而構極三清韞祕控碧落而

寶范十四

七

崇因雖大道無爲濟物歸於善貸而妙門有教滅咎
在於希聲景龍觀者中宗孝和皇帝之所造也曾城
寫質閭苑圖形但名在騫林而韻停鍾籥朕翹情八
素締想九元命彼鼓延鑄斯無射考虞倕之懿濃得
晉曠之宏規廣召鯨互遠徵鳧匠耶溪集寶麗壑收
珍警風雨之辰節昏明之候飛廉扇炭屏翳營鑪翥
鶴呈姿蹲熊發狀角而不震侈而克揚庶其曉散靈
音鎮入鵷鸞之殿夕騰仙韻恒流鳩鶴之闈聾俗聽
而咸痊迷方聞而永悟淇鈞式啓寶字攸鑄其銘曰
紫宸御歷青元樹曰傾巖集寶竭府收珎杜夔律應
張永規陳形包九乳儀超萬鈞上資七廟傍延兆人

風巖韻急霜重音新自茲千歲從今億春懸玉京而
薦福侶銅史而司辰
景雲二年太歲辛亥金九
月癸酉金朔一十五日丁亥土鑄成

唐渾儀銘

後魏太史令晁崇修渾儀以觀星象按其儀以永興
四年歲次困敦原注王子也案是歲壬子是歲壬子創造傳至後魏末入齊
往周隋至于大唐歷年久遠儀蓋傾墜日以原注太史
也去景雲三年奉勅重令脩造使銀青光祿大夫
檢校將作少監楊務廉與銀青光祿大夫行太史令
瞿曇悉達正議大夫行太史令李仙宗試太史令殷
知易荊州都督祕書監兼右衛率薛玉銀青光祿大

夫檢校祕書監吳師道正議大夫行祕書少監閣朝

隱等首末共營各盡其思至先天二年歲次赤奮若

原注丑也案成其銘曰周天三萬七千里分寸無欺成歲三百六十日盈縮

有期敬之敬之以授人時

號國公楊花臺銘并序

唐申屠液

原夫真性卽空從色聲而有相道源無體因法教以沿流所以人天捨千萬之資神鬼建由旬之塔金衣紺髮盡留多寶之臺銀疊青蓮並入眞珠之藏湛然釋氏一千餘年輔國大將軍號國公楊等皆天子貴臣忠義盡節布衣脫粟將軍有丞相之風牛車鹿裘

驃騎滅中人之產爰抽淨俸申莊嚴之事也華簷覆像盡垂交露之珠玉砌連龕更飾雄黃之寶風箏逸韻飛妙響於天宮花雨依微灑輕香於世界猶恐蓬萊築變石折不周仍鑿長者之經必勒輪王之偈書工紀事迺爲銘曰

昭昭大覺巍巍聖功身融剎海頭治虛空開衆趣以室惕闡元門以包蒙物成緣而必應理無幽而不通有美至人股肱良臣受聖寄狂聞難經綸英謀貫土韜略通神一蒙金鉞屢建華勛善代不伐功成不居功歸天子善托眞如乃貢靈相用答冥符佛心雖空佛福常在願普此因同臻性海
開元十二年十

月八日判官亳州臨渙縣尉申屠掖撰案此序及銘在西安府花塔寺分刻序與銘各為一石故於銘前另題云楊將軍新莊像銘著錄金石者多分為二王氏萃編始知其誤今從之去

古井銘

唐趙光乘

天寶九載冬十月尉趙光乘檢校造因勒銘云

費城之井昭然道周土缶舊得石幹今修徵大易之

不改垂一善於千秋未有紹聖四年逢完題字井在

得籍羊之井費即李氏邑此銘前人未載

崑臺銘

唐元結

浯溪東北廿餘丈得怪石焉周行三四百步從未申

至丑寅崖壁斗絕左屬回鮮前有磴道高八九十尺

下當洄潭其勢礪礪半出水底蒼蒼然泛泛若在波
上石顛勝異之處悉為亭堂小峯嵌竇宜開松竹掩
映軒戶畢皆幽竒於戲古人有畜憤悶與病於時俗
者力不能築高臺以瞻眺則必山巔海畔伸頸歌吟
以自暢達今取茲石將為崑臺蓋非愁怨乃所好也

銘曰

湘淵清深崑臺隋陵登臨長望無遠不盡誰厭朝市
羈牽局促借君此臺豈縱心目陽崖礪琢如瑾如珉
作銘刻之彰示後人 有唐大曆二年歲次丁未
六月十五日刻河南元結字次山撰

唐廡銘

唐元結

浯溪之口有異石焉高六十餘尺周回四十餘步西
面在江中案西篆作凶古文東望嶧臺北面臨大淵
南枕浯溪唐顧字即亭當嶧石上異木夾屎字即戶疎竹
秀簷瀛州言无諤字即由此可信若在嶧上目所厭者
遠山清川耳所厭者水聲松歛霜朝厭者寒日方暑
厭者清風於嶧厭不厭也厭猶愛也命曰唐嶧旌獨
有也銘曰
一名之五蓋字得木土林埜之客所就水石年將
簞刻此銘始有唐嶧愜心自適與世忘情嶧秀石上
有唐大曆貳年歲次戊申閏六月九日

東厓銘

唐元結

嶧臺西面敝伎高迥在唐亭為東厓下可行坐八九
人其為形勝與石門石屏亦猶宮羽之相資也銘曰
嶧臺蒼蒼西厓雲端亭午厓下清陰更寒可容枕席
何事不安

大岷山銘

唐洪經綸

登於大岷俞古文禹所經過頂凸坤儀根壓洪河天生
忠良濟物宏多山靈河神俾環海戢戈
唐建中元年四月廿六日勅魏博成德幽州等道黜
陟使諫議大夫洪經綸題石刻在黎陽山以黎陽為
在今汜水不在瀋縣也

唐濟瀆廟北海壇二所新置祭器沈幣雙舫雜

物之銘 并序 唐張洗

有唐六葉海內晏然偃革儒宗乎祀典封茲瀆為清源公建祀於泉之初源也置瀆令一員祝史一人齋郎六人執魚鑰備灑掃其北海封為廣澤王立壇附於水之濱矣天子以迎冬之日命成周內史奉祝文宿齋毳冕七旒五章劍履玉珮為之初獻縣尹加繡冕六旒三章劍履玉珮為之亞獻邑丞元冕加五旒無章亦劍履玉珮為之終獻用三牲之享邦之大事先在祀乎濯纓不才謬領茲邑下車入廟每事皆問主者有云俎豆素闕弊難悉數其尤者有五北海

望壇臨事壘土朽椽一歲而費數金為勞之甚其弊一也二所祭器凡百有二十二事至時請於上察轉轂入洛去來三百餘里仍以稅緡酬之積有歲時不知窮極其弊二也沈幣雙舫又以車取沁河渡口之舟往返之勞結綵之飾其弊三也兩壇位席百領有餘戶至誅求為擾非潔其弊四也牀榻乃至匕箸器用之類門到斂索事終存亡大半其弊五也既革前弊輒為之銘銘曰
寤寐求思如神有知大風離披壞木於斯人吏驚馳念茲悟茲前年夏及今年春大風壞殿數椽為余因用此材而為祭器兼沈幣之舫也有意廟中無備沈幣雙舫二壇祭器子來悅使所借

經苑十四

卷

皆遂觀者闐闐事無闕焉刻之於石以俟後賢是時也貞元十有三年朝散大夫行河南府濟源縣

令張洗字濯纓撰

軒轅黃帝鑄鼎原碑銘并序 唐王顏

惟天為大惟帝堯則之惟道為大惟黃帝得之南華經曰道神鬼神帝生天生地黃帝守一氣衍三墳以治人之性命迺鑄鼎茲原鼎成上升得神帝之道原有為谷之變銘紀鑄鼎之神銘曰道匪神帝帝在子人大哉上古軒轅為君化人以道鑄鼎自神漢武秦皇仙冀徒勤去道日遠失德及仁恭惟我唐元德為鄰方始昌運皇天所親唐與茲原

名常鼎新 虢州刺史太原王顏撰華州刺史兼

御史中丞陳郡袁滋籀書唐貞元十七年歲次辛巳

正月九日癸卯建

南溪元巖銘并序 唐李涉

桂為郡也巖其先之有井室人民百千祀矣居是邦者匪哲則豪何四三里之內而巖不載於前籍為巖將屈於古而合伸於今哉為人未知其巖巖俟人以時哉青溪子昧而未詳也予之仲曰渤受天雅性生不雜玩少嘗讀高士傳列仙經遊衡霍幽遐之境巢嵩廬水石之奧凡俗所覩必皆礪磨大璞翦鑿遺病意適而制非主於名寶初自給事中出藩於桂一

續苑十四

卷

續苑廿四
之年治鄉野之病二之載搜郭郭之遺得隱山元巖
冥契素尚余因謫去炎海途由桂林巖之勝再遂其
賞勒銘洞石表遠跡於他年銘曰
桂之有山潛靈億年拔地騰霄戟列刀攢巖之有洞
窈窕鬱盤虎挂龍懸形狀萬端威馳杳冥仰沓噴
玉落磬墜幽聲晝寒巴陵地道小有洞天文籍之聞
吾何有焉酒一卮兮琴一曲堪巖之下可以窮年

青溪子李涉

後浯溪銘

唐王邕

巋然晤臺枕於祁陽迥然楚方臨於瀟湘孤標一峯
不止百尺嵯峨巨峻潔堪礪英才別業雅有儒風

河南元公高卧其中位為獨坐人不知貴興愜茲地
心閑勝事松花對偃薜葉交垂鑿巖作逵因泉漲池
乃構竹亭乃葺茅宇羣書當戶靈藥映圃嘉賓駐舟
愛子能文弄琴對雲酒熟蘭薰何必磻溪方可學釣
何必衡嶠方可長嘯我牧此郡契於幽尋刻銘山岑
敢告烟林

修養雜訣氣銘

一氣未分三才同源清濁既異元氣各存天法象我
我法象天我命在我不在於天昧用者天善用者延
性和志寂守一神閑靈芝在身不在於山返一守和
理合元元精極乃明神極乃靈氣極乃精無氣乃冥

因氣而衰，因氣而榮，因氣而死，因氣而生。喜怒亂氣，性情交爭，擁構成患。神形豈^①鍊陽銷陰，其氣自行以正遠邪。其患自平，乾坤澄淨。子後午前，閉目平空，握固冥然，納息虛中。吐息天關，入息微微，出息絲絲。以意引氣，臟腑迴旋。然後呵之，榮衛通宣。但有不和，遣之踵前。五呵六呵，無疾不蠲。凡欲胎息，導引為先。經脈不擁，關節不煩。或如射雕，側身彎環。或舉腰膝，如蟾半圓。交匝腦後，左旋右旋。勁展兩足，氣出指端。擺掣四肢，捉搦三關。熟摩尺澤，氣海亦然。叩齒集神，合眸固關。真心忘形，任意往還。覺氣調勻，擁塞喉閒。擁氣則咽，三五相連。轉舌漱入，咽下丹田。以意送之。

令聲汨然，一咽三咽，再咽如前。三十六咽，胎息成焉。大道無為，為於無為。不為為為，莫若無為。不思為思，莫若無思。萬法自然，不假施為。不寒不熱，不渴不飢。恬淡無為，以道自怡。妙中之妙，微中之微。懷道君子，銘之佩之。

唐鏡銘

絕照覽心，圓輝矚面。藏寶匣而光掩，挂玉臺而影見。鑒羅綺於後庭，寫衣簪乎前殿。

又

團團寶鏡，皎皎昇臺。鸞窺自儷，照日花開。臨池似月，覩兒嬌來。

又

月掾團圓水掾清好將香閣伴閑身青鸞不用羞孤影開匣當如見故人

許長史井銘

徐鉉

長史含道棲真九天人非邑改丹井存焉射茲谷鮒冽彼寒泉分甘玉液流潤芝田我來自西尋真紫陽若愛邵樹如升魯堂敬刊翠_珍永識銀牀噫嗟後學挹此餘光此銘集內未載

盧縣說性亭銘

宋申革

我饗皇澤粵自前年罷秩浙右宰邑河邊下車餘月曾不怡顏蓋其公舍啻陋非全俄選隙地構亭成間

茅覆其上莎植其前南瞻巨浸西逼深泉北依綠樹東對青山周回顧望景色相連自公之暇據此幽閑命題說性孰謂不然勒銘因事萬世縣_{皇宋}化二年十月廿日立碑在陽穀安樂鎮山左金石志缺載子始訪得其文

泰山天門銘

元杜仁傑

元氣裂兩儀具五岳峙真形露惟岱宗儼箕踞仰彌高屹天柱浩干劫室來去誰為繫起天慮非斤斧乃祝詛一竅開達底處十八盤盤千步薺初吐抱圍樹日車吳慘曦馭六龍頽莽迴互踏此往嘉無數無懷下兵刑措七十君接鑾輅聖道熄彝倫敦揖讓歇篡

奪屢忽焉闔梗無路象緯森勅訶護朝百靈由茲戶
金璀璨朱閒布九虎蹲萬夫怖我欲叩闔者怒闔何
時坦如故對冕旒獲控愬豁蒙蔽泄塵霧刮政疵剔
民蠹上得情下安作額血殫帝聰悟崖不磨蒼壁豎
刻我銘期孔固垂萬世正王度

續古文苑卷第十四

續古文苑卷第十五

賜進士及第授通奉大夫山東通省督糧道加三級孫星衍撰

碑志一

三公山碑

元初四年常山相隴西馮君到官承饑衰之後衆惟
三公御語山三條別神迴在領西吏民禱祀興雲膚
寸徧雨四維遭離羌寇蝗旱鬲斥民流道荒醮祠希
罕敬奠不行由是之來和氣不臻乃來道要本規其
原以三公惠廣其靈尤神處幽道艱存之者難卜擇
吉土治東就衡山起堂立壇雙闕夾門薦牲納禮以
盛其神神熹其位甘雨屢降報如景響國界大豐穀

斗三錢民無疾苦永保其年長史魯國顏浮五官掾
閻格戶曹史紀受將作掾王籀元氏令茅匡丞吳音
廷掾郭洪戶曹史翟福工宋高等刊石紀焉翁氏釋文規誤

作視衡山上脫就字

漢滎口石門碑

漢邊韶

惟陽嘉三年二月丁丑使河隄謁者王誨疏達河川
適荒庶土往大河衝塞侵齧金堤以竹籠石葺土而
為塼壞隕無已功消億萬請以濱河郡徒疏山采石
壘以為障功業既就徭役用息辛未詔書許誨立功
府卿規基經始詔策加命遷在沈州乃簡朱軒授使
司馬登令纘茂前緒稱遂休功登以伊洛合注大河

南則緣山東過大伾回流北岸其勢鬱懔濤怒湍急
激疾一有決溢彌原淹野蟻孔之變害起不測蓋自
姬氏之所常蹙昔崇鮐所不能治我二宗之所劬勞
於是乃跋涉躬親經之營之比率百姓議之於臣伐
石三谷水匠致治立激岸側以捍鴻波隨時慶賜說
以勸之川無滯越水土通演役未踰年而功程有畢
斯乃元勲之嘉課上德之宏表也昔禹修九道書錄
其功后稷躬稼詩列於雅夫不憚勞謙之勤夙興厥
職充國惠民安得湮沒而不章焉故遂刊石記功垂
示於後其辭云云案鄭氏云石銘歲遠字多淪使河
隄謁者山陽東緡司馬登字伯志代東萊曲成王誨

字孟堅河內太守宋城向豹字伯尹丞汝南鄧方字

德山懷令劉丞字季意河隄掾匠等造陳留浚儀邊

韶字孝先頌碑云陳留邊韶字孝先頌漢人立碑之

河南則緣山東遇大任足證漢人所言大

惟漢永和二年八月敦煌太守雲中裴岑將郡兵三

千人誅呼衍王等斬馘部眾克敵全師除西域之虞

同蜀四郡之害邊竟艾安振威到此立海祠以表萬

世海祠言祠在西

漢永康元年月惟昔帝堯聖德慶苞宏號赫

濟陰太守孟郁修堯廟碑

赫蕩蕩垂基赤精之冑為漢始別陵氣炎熅上交倉

魏魏之盛乾川見徵敬修宗壑長吏奉祠三牲粢

饌獻珍于時俵著燿銘宣颺厥休乃招禎祥萬是

來鴻名遂顯傳于千秋

濟陰太守河南偃陟孟府君諱郁字敬達治尚書經

博覽眾文天姿瑋度體性溫仁闡極道之要妙游觀

六藝之原撮旋機之政務在濟民歷典六郡威教若

神遺訓垂歌淵懿允純功績煥炳恩如浩倉咨招巖

穴股肱賢良廣祈多福雯夙興聞帝堯陵在成陽

遣戶曹掾史其中宰祠常以甲子日與西宮樂生俱

詣大聖陳上古之禮舞先王之樂鞀磬祝囀五音

之儀莫不盡備敷列技藝以榮大聖延熹十
年仲春二月陽氣浸陰始雪來享祀羣神仰瞻雲
漢孟府君奉宣詔書行縣到成陽將辭帝堯行禮未
周則景雲四集翔風膏雨即時大降嘉樹優沾利茂
萬物陰陽和協百姓賴福是時欣然悅諸產
繁殖倉庾充塞孟府君深惟響應效之經典知聖堯
精靈與天通神修治壑地致播湖石闌二坐昭
配帝圖象規柜五畫上下相承無所遺失陟工
旌密有班道之巧使府內百石城吳諱升字三君
守衛園陵興置屋詔書大祠升與縣令丞恭奉肅
敬齊絜炊爨莫不雍雍列種柏樹吏卒養護南通靈

臺東注城域委曲阜而墀然望圖紀萬世功驗永
著時令河南河南呂君諱亮字元山辛政宣化慈惠
博覆為藜元來福奉事大聖司司不解垂拱無為如
治案今本隸釋誤治為始據洪文惠跋其允君也承
云其言無為如治正之如即而字也河內州王諱萇字伯盛左尉穎川穎陽諱愔字世
高皆關綜雅藝通洞運度詢于上下僉然同謀因孟
府君飭治大壑自率掾史駐駕便坐南北望
表內相副赫如屋楮蘭然成就孟府君必受大聖嘉
福公侯傳子孫濟陰吏士歌術功稱萬世常存成陽
丞民蒙其榮賜訓發聲呂君諸壁干祿于天令裕
衍尊永无窮

惟序仲氏祖統所出本繼於姬周之遺苗天生仲山甫翼佐中興宣平功遂受封於齊周道衰微失爵亡邦後嗣乖散各相土譯居帝堯萌兆生長葬陵在於成陽聖化常存慕魏魏之盛樂風俗之美遂安處基業屬都鄉高相里因氏仲焉以傳于今子孫承緒履仁好義耽樂道術教授經業雍徒帶衆滋滋汲汲誨人不倦海內稱之曰馮術之宗天監孔明祚善應印緋相承銀艾不絕稟性乾元世世廉約故能高如不危滿如不溢孟府君繕飭殿牆立百石舍仲氏宗家共作大墜前石礧階陛欄楯貧富相扶會計欣懽不謀同辭錢應時即具招工募石燿然俱至各進琦

巧不日成之詔書九月三往大祠諸所造作煥然成就仲氏宗家並受福賜復刊碑勒誅昭示來世表著孟府君美勛於陽昧疑尋字紀祖禰所出官位宦學皆不可測子子孫孫必蒙大聖休烈之福以勸後進昌熾無極

淳于長夏承碑

君諱承字仲亮東萊府君之孫大尉掾之中子右中郎將弟也累葉牧守印紱典據十有餘人皆德任其位名豐其器是故寵祿傳于歷世策薰著于王室君鍾其美受性淵懿含和履仁治詩尚書兼覽羣藝靡不尋暢州郡更請屈已匡君為主薄督郵五官掾功

曹上計掾守令冀州從事所在執憲彈繩糾枉忠絜
清肅進退以禮允道薦愛先人後己克讓有終察孝
不行大傅胡公歆其德美旌招俯就羔羊在公四府
歸高除淳于長到官正席流恩褒善糾姦示惡旬月
化行風俗改易幡軒六纒飛躍臨津不日則月皓天
不弔殲此良人季五十有六建寧三季六月癸巳淹
疾卒官嗚呼痛哉臣隸辟踊悲動左右百姓號咷若
喪考妣嗚呼孤憤泣切怛傷摧勒銘金石惟以告哀其
辭曰

於穆皇祖天挺應期佐時理物紹縱先軌積德勤約
燕于孫子君之羣感並時繁祉明明君德令問不已

高山景行慕前賢別庶同如蘭意願未止中遭冤天
不終其紀夙垂賈祚早喪懿寶抱器幽潛永歸蒿里
痛矣如之行路感動黨魂有靈烝後不朽

成陽靈臺碑

惟帝堯母昔者慶都兆含穹精氏姓曰伊體蘭石之
操履規矩之度則乾川之象通三光之曜游觀河濱
感赤龍交如生堯厥後堯來案當是祖統慶都告以
河龍堯歷三河有龍授圖躬行聖政以育苗萌火陽
之盛先閭後明遂以侯伯返踐帝宮慶都僊歿蓋至
于茲欲人莫知名曰靈臺上立黃屋堯所奉祠下營
以水神龍所嘉靈龜隱刑汾踊波流比目鱈魚灌鱗

通泉元礫菴蘆生逆臺涯貫長厯久崇如三代
改易荒廢不脩五運精還漢受濡期興滅繼絕如堯
為之承嗣基年鯀魚復生故有靈臺畜夫魚師衛仕
驛憲鯀魚服之逆壽之際道小衰沮遂遭亡新
禮祠絕矣於是故廷尉仲定深惟大漢隆盛德彼四
表太平未至靈瑞未下四夷數侵軍甲數擾匪皇啓
居日禋不夏案經孝典河洛祕爽漢感赤龍堯之首
胄當脩拜祠追遠復舊復治黃屋推原聖意灾生變
見天以譴告前後奏上陳敘大義招祥塞咎為漢來
祚朝廷克省帝納其謀歲以春秋奉大宰祠時廷尉
选位連自兩漢金石記云所見重刻表奏詔英嘉命

遂見聽為大中大夫歸治黃壑令月吉日圖立
規坐興業會工厥震夷平上合天意下應大
飭五色華精上重刻木闕通天戶嚮少陽前設大
壑俟神之堂地致石墀其下清涼可舞儿以大
章時濟陰太守魏郡審晃成陽令博陵管遵各遣大
掾輔助仲君經之營之不日成之神靈精氣依怙於
人廢之則亡存之則神復帥羣宗貧富相均共慕市
碑著立功訓勒石銘中門之表上擇元日齊革精
誠先薦毛血謹慎犧牲祈祠獲福神享其靈甘雨時
降百穀孰成幽荒率服徐方來庭萬國蒙祉犁元賴
榮莫不被德咸歌頌聲其辭曰

於赫慶都德彊大兮承神精燿統赤裔兮爰生聖堯
名蓋世兮上受符命迺帝制兮廣彼之恩流荒外兮
歷紀盈千垂遺愛兮陵廟復崇享大祭兮上來多愆
降福沛兮萬國禧寧孰不賴兮光宣美勛永■馨兮
垂視罔極億萬歲兮
濟陰太守魏郡陰安審君諱晃字元讓從公車令來
成陽令博陵蠡吾營君諱遵字君臺從東明門司馬
來丞穎川新汲尹茂字伯舉選下邳尉尉穎川襄城
楊調字君舉仲訢伯海從右中郎將選鉅鹿太守仲
球伯儀從大尉掾選呂長仲選孟高辟司徒府選徙
不絕皆興治大聖黃屋之力

建寧五年五月造

司隸校尉楊淮碑

故司隸校尉楊君厥諱淮字伯邳舉孝廉尚書侍郎
上蔡雒陽令將軍長史任城金城河東山陽太守御
史中丞三爲尚書尚書令司隸校尉將作大匠河南
尹伯邳從弟諱彌字穎伯舉孝廉西鄂長伯母憂去
官復舉孝廉尚書侍郎選左丞冀州刺史大醫令下
邳相元弟功德牟盛當究三事不幸早隕國喪名臣
州里失覆二君清頌約身自守俱大司隸孟文之元
孫也

黃門同郡卞玉字子珪以熹平二年二月廿二日謁

歸過此追述勒銘故賦表記

賦即尋字或誤釋為則

武都太守耿勳碑

漢武都太守右扶風茂陵耿君諱勳字伯璋其先本
自鉅鹿世有令名為漢建功俾侯三國卿守將帥爵
位相承君迄于君君敦詩說禮家仍典軍壓難和戎
武慮慷慨君得奉貢上計廷陳惠康安過之謀上納
其謨拜郎上黨府丞掌令考績有成符莢乃洪闕肥
熹平二年三月六日郎洪闕官奉宣詔書哀閔垂恩
猛不殘義寬不宥姦喜不縱慝威不戮仁賞恭罰否
畀主洪闕奧流其於統系洪闕寵存贈亡篤之至也
歲在癸丑厥運淫雨傷害稼穡率土皆議開倉振澹

身冒炎赫火星之熱至屬縣巡行窮匱陟降山台經

營拔涉草止露宿扶活屨洪闕石記云下補兩漢金餐洪闕今

改千有餘人出奉錢市洪闕雨洪闕寡獨王佳小男楊孝等三

乏發荒田耕種賦與洪闕今洪闕勸課洪闕勉趨時百姓樂

百餘戶減省貪吏二百八十人洪闕勸課洪闕勉趨時百姓樂

業老者得終其壽幼者得呂全育甘棠之愛不是過

矣又開故道銅官鑄作錢器與利無極外羌且居洪闕

今等佈威悔惡重譯乞降修治狹道分子効力復大

洪闕此二字洪闕小民洪闕農如得眾地之歡心可謂印之若明神

者已天美政不紀人無迷焉國人僉洪闕命洪闕莫刊勒斯

石表示無窮其辭曰

泰華惟岳神曜吐精育茲令德既詰且明寔謂耿君
天胙顯榮司牧莅政布化惟成柔嘉惟則穆如風清
勤卹民隱拯阨扶頽匪今洪關皇啓處字洪關二東撫西
征赤子遺慈曰活曰生山靈挺寶今洪關凶灾今洪關乃字洪誤
平愷悌父母民賴曰寧熹平三年四月廿日壬
戊西部道橋掾下辨李禋造此碑校隸續有字不同

豫州從事尹宙碑

君諱宙字周南其先出自有殷迺迄于周世作師尹
赫赫之盛因以為氏吉甫相周宣勤力有章文則作
頌武襄獫狁二子著詩列于風雅及其元孫言多世
事景王載在史典秦兼天下侵暴大族支判流僊或

居三川或徙趙地漢興以三川為潁川分趙地為鉅
鏡故子心騰於楊縣致位執金吾子孫以銀艾相繼
在潁川者家于僑陵克續祖業牧守相亞君東平相
之元會稽大守之曾富波侯相之孫守長社令之元
子也君體溫良恭儉之德薦親於九族恂恂于鄉黨
交朋會友貞賢是與治公羊春秋經博通書傳仕郡
歷主簿督郵五官掾功曹守昆陽令州辟從事立朝
正色進思盡忠舉衡以處事清身以厲時高位不以
為榮卑官不以為恥含純履軌秉心惟常京夏歸德
宰司嘉焉季六十有二遭離寢疾熹平六年四月己
卯卒於是論功敘實宜勒金石乃作銘曰

於鑠明德于我尹君龜銀之冑奔世載勛綱紀本朝
優劣殊分守攝百里遺愛在民佐翼牧伯諸夏肅震
當漸鴻羽為漢輔臣位不福德壽不隨仁景命不永
早即幽昏名光來世萬祀不泯

溧陽長潘乾校官碑

蓋漢三百八十有七載于銘功著

斯金石其誄曰

溧陽長潘君諱乾字元卓陳國長平人蓋楚太傅潘
崇之末緒也君稟資南霍今補之禮天
單禧釋文兩漢金石記德之絕捺髻髦克
祀作神天補後有德之絕捺髻髦克
或洪闕今志學典謨祖講詩易剖演奧藝外覽百氏

洪作眾儁洪闕依單釋兩挈聖抱不測之謀秉高世

疾惡義形從風征暴執訊獲首除曲阿尉禽姦茂猾

寇息善歡履蕪竹之廉蹈公儀之絜察廉除茲初案

口之迹密化放虐岐周流愛雙虜脩今洪闕親啟寶智進

直退慝布政優優令儀令色獄無呼嗟之冤壅無叩

匈之結矜孤頤老表孝貞節重義輕利制戶六百省

無正繇不責自畢百姓心歡官不失實於是遠人聆

聲景附樂受一屨既來安之復洪闕依役三年惟泮

宮之教反失洪闕依俗之禮構修學官洪作宗懿招

實為初未詳碑厲清肅賦仁義之風脩今洪闕或釋

字當作初未詳碑厲清肅賦仁義之風脩今洪闕或釋

實為初未詳碑厲清肅賦仁義之風脩今洪闕或釋

實為初未詳碑厲清肅賦仁義之風脩今洪闕或釋

實為初未詳碑厲清肅賦仁義之風脩今洪闕或釋

實為初未詳碑厲清肅賦仁義之風脩今洪闕或釋

實為初未詳碑厲清肅賦仁義之風脩今洪闕或釋

實為初未詳碑厲清肅賦仁義之風脩今洪闕或釋

實為初未詳碑厲清肅賦仁義之風脩今洪闕或釋

德既安且洪作呂依寧于侯用張廔豆用嗽發彼有

的雅容閑鍾磬縣矣于旨樂焉乃作敘曰

翼翼聖慈惠我羣蒸貽我潘君平茲溧陽彬文趙武

扶弱抑彊龕今洪補劉顓雄流惡顯忠咨疑元老師啟

作朋修學童冠琢質繡章實天生德有漢將興尚且

在昔我君存今即洪開依此龜艾遂尹三梁永垂支

百民人所彰子子孫孫卑尔熾昌

丞沛國銓趙勳字萼伯左尉河内汲董並字公房右

尉鴻章南昌程陽字孝遂

時將作吏名戶曹掾楊淮議曹掾李就議曹掾梅洪

桓依單檜戶曹史賀從掾位侯祖主記史吳超門

下史吳訓門下史吳翔門下史時球

光和四季十月己丑朔廿一日己酉造此碑校隸釋

出者詳每字下反失俗之禮建康志作拾之禮

視碑實為失俗元至順癸酉濟陰單禧釋文是矣

郃陽令曹全碑

君諱全字景完敦煌效穀人也其先蓋周之胄武王

秉乾之機翦伐殷商既定爾勳福祿攸同封弟叔振

鐸于曹國兩漢金石記因氏焉秦漢之際曹叅夾輔

王室世宗廓土岸竟子孫遷于雍州之郊分止右扶

風或在安定或處武都或居隴西或家敦煌枝分葉

布所在為雄君高祖父敏舉孝廉武威長史巴郡胸

忍令張掖居延都尉曾祖父述孝廉謁者金城長史

續苑十五

夏陽令蜀郡西部都尉祖父鳳孝廉張掖屬國都尉
丞右扶風隃麋侯相金城西部都尉北地太守父琫
少貫名州郡不幸早世是以兩漢金石記位不副德
君童齠好學甄極懿緯無文不綜賢孝之性根生於
心收養季祖母供事繼母先意承志存亡之敬禮無
遺闕是以鄉人爲之諺曰重親致歡曹景完易世載
德不隕其名及其從政清擬夷齊直慕史魚歷郡右
職上計掾史仍辟涼州常爲治中別駕紀綱萬里朱
紫不謬出典諸郡彈枉糾邪貪暴洗心同僚服德遠
近憚威建寧二年舉孝廉除郎中拜西域戊部司馬
時疏勒國王和德弒父墓位不供職貢君興師征討

有充臆之仁分醪之惠攻城野戰謀若涌泉威牟諸
賁和德面縛歸死還師振旅諸國禮遺且二百萬悉
以薄官遷右扶風槐里令遭同產弟憂棄官續遇禁
囚潛隱家巷七年光和六年復舉孝廉七年三月除
郎中拜酒泉祿福長詆賊張角起兵幽冀兗豫荆楊
同時並動而縣民郭家等復造逆亂燔燒城寺萬民
騷擾人裏不安三郡告急羽檄仍至于時聖主諮諏
羣僚咸曰君哉轉拜郃陽令收合餘燼芟夷殘逆絕
其本根遂訪故老商量案碑陰云縣三僕艾王敞王
畢等恤民之要存慰高年撫育鰥寡以家錢糴米粟
賜瘠盲大女桃斐等合七首藥神明膏親至離亭部

吏王臯案此臯字也程橫案碑陰云故市掾程黃
等賦與有疾者咸蒙瘳悛惠政之流甚於置郵百姓
繼負反者如雲戢治廡屋市肆列陳風雨時節歲獲
豐年農夫織婦百工戴恩縣前以河平元年遭白茅
台水災害退於戊亥之間興造城郭是後舊姓及修
身之士官位不登君乃閱縉紳之徒不濟開南寺門
承望畢嶽鄉明而治庶使學者李儒案碑陰云徵博
變規程寅等各獲人爵之報廓廣聽事官舍廷曹廊
閣升降揖讓朝覲之階費不出民役不于時門下掾
王敞錄事掾王畢案碑陰云故門下掾王敞元主簿
王歷戶曹掾秦尙案碑陰云故功功曹史王顓等嘉

慕奚斯考甫之美乃共刊石紀功其辭曰
懿明后德義章貢王庭征鬼方威布烈安殊荒還陟
旅臨槐里感孔懷赴喪紀嗟逆賊燔城市特受命理
殘圮芟不臣寧黔首繕官寺開南門闕嗟峨望畢山
鄉明治惠沾渥吏樂政民給足君高升極鼎足
中平二年十月丙辰造

秦君碑

余聞湯武千載周孔異世以義相高况余忝祿踐跡
遵基竊慕揚善喟然而嘆其鄙辭曰
於穆秦君命世優邁承祖皇裔出羣紀行錄功
必本其初惟君總角勵志仲尼從容六藝佃田疇

續苑十五

西

升階英妙轉典蒸黎為政崇博五教並和仁賢敘位
法依蕭何圖圉空虛鄉無遁逃凡百肅雍莫不率從
境內既寧路不資遺耕夫千畝餘種不歸立清介白
食茹拔葵三年有成嬰兒謠歌鼓腹喜德踊躍嘔唏
水靜魚集國富民繁戶增十倍牧守孔嘉怒不斷刑
寬不容非化淮邠邵比翻而飛永如南山不缺不虧
畧取大較丹書刻石垂示後昆識者察焉碑在滕縣今不存蓋近歲失之也

靈帝河間舊廬碑

漢張超

赫赫在上陶唐是承繼德二祖四宗是憑上龜鑒乎
義農中結軌乎夏商元首既明股肱惟良乃因舊宇

福德所基修飾經構農隙得時樹中天之雙闕建冠
山之華堂通樓開道丹階紫房金牕鬱律玉璧內瑤
青蒲充庖朱草棲箱川魚踴躍雲鳥舞翔煌煌大漢
合德乾綱體効日月驗化陰陽格于上下震暢八荒
三光宣曜四靈効祥天其嘉享豐年穰穰騶虞奏樂
鹿鳴薦觴工祝致告福祿來將永保萬國南山無量

魯夫子碑

漢禰衡

受天至精純粹睿哲崇高足以長世寬容足以廣包
幽明足以測神文藻足以辨物然而敏學以求之下
問以諏之虛心以受之深思以詠之愍周道之邈遠
悼九疇之乖悖故發憤忘食應聘四方魯以大夫之

位任以國政之權譬若飛鴻鸞於中庭聘騏驎於閭巷也是以期月之頃五教克諧移風易俗邦國肅焉無思不服懿文德以紆餘綬三五之紀綱流洪耀之休赫曠萬世而揚光夫文明以動天則也廣大無疆地德也六經混成洪式也備此三者聖極也合吉凶於鬼神遂殂落於夢寐是以風烈流行無所不通故立石銘勛以示昭明辭曰煌煌上天篤降若人邈矣悠哉千祀一鄰明德監情性存存奕奕純嘏稽憲乾坤曜彼靈祇以訓黎元終日乾乾配天之行在險而正在困而亨窮達之運委諸穹蒼日月則陰天地不光聖獻殂崩大猷不綱

顏子碑

漢 禰衡

稟天地之純和鍾岳瀆之休靈睿哲之姿誕自初育英絕之才顯乎嬰孩在束脩之齒入宣尼之室德行邁於三千仁風橫於萬國知微知彰聞一覺十用行舍藏與聖合契名爲四友之冠實盡疏附之益爾乃安陋巷挹清流甘簞瓢以充飢雖屢空而不憂于時河不出圖周祚未訖仲尼無舜禹之功先生包元凱之烈其辭曰亞聖德蹈高蹤遊洙泗肅禮容備懿體心彌沖秀不實振芳風配聖饋圖辟雍紀德行昭罔窮

吳九真太守谷朗碑

續苑十五

卷

府君諱朗字義先桂陽耒陽人豫章府君之曾孫公
府君之孫郎中君之子也其先世自顓頊益為舜虞
賜姓嬴氏至于扉子封於秦谷因而氏焉君承洪原
之清流稟奕世之高素履道思順德行純備三歲喪
母十一亡父獨與弟居承奉繼親和顏悅色孝友溫
恭曾閔之操君其蹈焉弱冠仕郡歷右職守陽安長
淑問宣浚遂升王府除郎中尚書令史郡中正遷長
沙劉陽令播渥惠以育物垂仁恩以布化莅政未期
徵拜立忠都尉尚書郎靖密樞機名冠眾僚此二字今釋
遷部廣州督軍校尉正身率下不畏疆御浚清蕩濁
萬里肅威此字今釋功成辭退拜五官郎中遷大中正平

衡清格彞倫攸敘于昔此字今釋交州竊巨判國戎車婁
起此二字今釋干戈未戢帝思碑又訓咨羣司僉以君往
部南州威恩素著此二字今釋遷九真太守君稟明德所
歷垂勲宜延遐紀光讚此字今釋皇家如何不永春秋五
十有四鳳皇元年四月乙未寢疾而卒嗚呼哀哉凡
百君子莫不嗟痛乃立碑作頌以顯行績其詞曰
於鑠府君稟性元通積行闡闕九族睦雍羽儀上京
德與雲騰入蹈丹墀夙夜靖恭出撫黎民風移俗興
名參豹產勲齊往縱當永黃耆翼佐帝庸昊天不弔
哲人其終濟濟縉紳靡瞻靡宗勒茲元石永光無窮
案歐趙著錄皆有此碑至翁氏兩漢金石記始載全文今以拓本釋其所缺并改訛錯

續苑十五
故使持節侍中太傅鉅平成侯羊公碑

晉李興

公諱祐字叔子泰山南城人也其先晉羊舌大夫之胄當漢中興始自南陽家于岱野纓冕相繼九世于茲矣顯祖南陽太守考上黨太守咸有能名公承俊烈之高風應明哲之盛代德擅規模仁成慈惠其器量宏深容度廣大浩浩乎固不可測已其志節言行卓爾不羣遊神元默散志青雲卷之以道籍博之以藝文于是仁聲遠耀芳風遐流年十有七上計吏察孝廉州辟不肯就羣公休之四府並命盤桓累載及公車徵拜中書侍郎祕書監于時當晉之盛明揚英

俊乃引公爲相國從事中郎遷中領軍遇革命之期任受禪之會秉文經武以集大晉之祚皇采增輝帝威遠邁偉絕代之風卷唐虞之緒帝嘉厥庸疇以大國公乃逡巡固讓裁居小邦天子俞咨仍復公中軍將軍散騎常侍內釐王度外綏區域嚴恭寅畏帝命允飭運國威于句陳握皇樞于紫極于時之盛未有上公者也拜衛將軍尚書僕射以揆天機崇成大業帝道緝熙泰階永肅以江寇未夷乃命公都督荊州諸軍侍中車騎將軍開府辟命乃養民募財開斥國界創築五城以防寇衛境然後闡敷皇風懷遠以德知大同之業思王道之則齊其土人均其利澤軍無

虞警民不疲勞農功盈疇百姓布野羣黎被德殊俗望風吳人感服襁負而至者四萬餘口進位征南大將軍公雖享有茅土厯登台階吐餼下士貳於姬公方將殫彼戎吳經國弔民然後偃甲戢兵辭功退身以優遊乎初好此公之素志也會遭篤疾春秋五十有八咸寧四年十有一月庚寅薨于京邑天子痛悼遣使持節追贈侍中太傅南城侯印綬賻弔加于常也及其葬上親臨過車騎諡曰成侯天子以公德高勛大而屢辭封爵故復建南城之國特以封公公哲讓終始上未之許及其薨也夫人夏侯氏追公克讓之志遂不以斂公自出身以至于終忠言不輟于口

嘉謀不廢于心成其業不處其功勤其勲不榮其祿儀型言行動爲世範暨六年春平吳策詔曰故太傅鉅平侯羊祜造建平吳之規潛謀遠畧與衆殊慮勲業不遂然蕩滅之計悉如祜策固能夷曠世之寇拯黎民之患勛烈宏著而寵不逮身其遣使以克定之功策告祜廟昔漢氏封蕭何夫人爲侯以崇顯元功亦古之令典封祜夫人爲萬歲鄉君食邑五千戶賜絹萬疋于是故吏高文奚廉等僉以公德高而志卑位優而行恭徽猷被于江漢懿德及於羣生涉其風者貪夫廉懦夫立雖夷惠之操奮乎百世曷以尚之竒謀潛畧清功遺緒靡所寘心乃共揭石刊勒盛軌

永表風烈焉其辭曰天臨有晉乃降皇輔猗歟惟公
應期協矩聰哲神睿乃文乃武曰唐曰虞淵淵其度
翼翼其明孝思以形乃耀高風辭爵讓榮為而不有
志凌太清如何不弔中年殞

末刊是表是旌

久漫滅再書于梁大同重立于唐大中三鐫于宋景
祐而元人周伯溫又摹而樹之今之存者則宏治十
四年重立者也府志以碑為李與初

撰蓋由誤讀者舊記又訛興為與耳

太公呂望表

齊太公呂望者此縣人也遭秦燔書史失其藉至大
晉受命吳會既平四海一統太康二年縣之西偏有
盜發冢而得竹策之書書臧之年當秦坑儒之前八

晉 盧无忌

十六歲其周志曰文王夢天帝服元襪以立於令狐
之津帝曰昌賜汝望文王再拜稽首大公於後亦再
拜稽首文王夢之之夜太公夢之亦然其後文王見
太公而訓之曰而名為望乎荅曰唯為望文王曰吾
如有所於見汝太公言其年月與其日且盡道其言
臣此以得見也文王曰有之有之遂與之歸以為卿
士其紀年曰康王六年齊太公望卒參考年數蓋壽
百一十餘歲先秦滅學而臧於三墓天下平秦而發
其潛書書之所出正在斯邑豈皇天所以章明先哲
著其名號光于百代垂示無窮者乎於是太公之裔
孫范陽盧无忌自太子洗馬來為汲令般谿之下舊

續列傳十五

年

有壇場而今墮廢荒而不治乃諮之碩儒訪諸朝吏
僉以爲太公功施於民以勞定國國之典祀所宜不
替且其山也能興雲雨財用所出遂脩復舊祀言名
計偕鑄石勒表以彰顯烈俾萬載之後有所稱述其
辭曰
於爍我祖時惟大公當殷之末德元通上帝有命
以錫周邦公及文王二夢惟同上帝既命若時登庸
遂作心膂寅亮天工肆伐大商克咸厥功建國胙土
俾侯于東奮乎百世聲烈弥洪般谿之山明靈所託
升雲降雨爲膏爲澤水旱厲疫是禳是禳來方禋祀
莫敢不敬報以介福惠我百姓天地和舒四氣通正

災害不作民無天命嘉生蕃殖遠近迄用康年
稼穡茂盛凡我邦域永世受慶春秋匪解無隕茲令
大康十年三月丙寅朔十九日甲申造

侍中嵇侯碑

裴希聲

夫君親之重非名教之謂也愛敬出於自然而忠孝
之道畢矣樸散真離背生殉利禮法之興於斯爲薄
悲夫晉弋陽子嵇紹字延祖資乾剛之純粹體中和
之淑靈少有清劭之風長懷宏仁之度加以通朗掩
濟靡才不經學爲儒宗庶績光被弱冠登朝則敷文
秘閣晚節強仕則納言樞極太安之初權臣擅命皇
輿親征次於蕩陰六軍奔散兵交御輦紹儼然端冕

續列傳十五

三

正色以扞鋒刃遂殞命於御側忠誠感人神義聲震四海銘曰
二儀肇建君臣攸序我我侍中應期作輔外播仁風
內舉心膂孰慈弗勇靡仁不武見危授命背生殉主
確乎其操邈乎其崇矯矯王臣憲茲遺風在親成孝
於敬成忠

右光祿大夫西平靖侯顏府君碑

晉李闡

君諱含字宏都琅邪臨沂人春秋以降戰國以前賢
智比肩備於載策昭穆次序上至顏燭漢末喪亂舊
譜淪亡自青州使君以上不復詳具祖欽給事貞侯

父默汝陰太守學素相承有聲邦黨君幼稟貞粹長
而好古睦親之譽發於羈貫每讀書見孝友通靈之
事輒悽然改容以為人神相與何遠之有但患人心
澆偽自絕於神耳苟能無以偽雜真神其捨諸修己
立誠盡歡就養訓行閨門義達州里久要心許之信
夷險不爽正冠納履之嫌終始不蹈兄畿患亡更生
君棄絕人事蓬首屏氣以就哈養者十有三年次
繁欽孫老而失明合藥須髯地膽有青衣童子持裹
授君出戶化成青鳥飛去本州辟不就鎮東琅邪王
參軍事過江累遷東閣祭酒朝議謂君正性端素學
行通深有命太子中庶子轉黃門侍郎本州大中正

續列傳十五

三

封回車縣侯轉侍中吳郡太守事停還除侍中國子
祭酒加散騎常侍光祿勳以年遜位就加右光祿大
夫門施行馬特賜牀帳被褥四時致膳固辭不受馮
懷欲爲王導降禮君不從曰王公雖重故是吾家阿
龍君是王親丈人故呼王小字王處明君之外弟爲
子允之求君女婚桓溫君夫人從甥也求君小女婚
君並不許曰吾與茂倫於江上相得言及知舊投淚
敘情茂倫曰唯當結一婚姻耳吾豈忘此言溫負氣
好名若其大成傾危之道若其闕敗也罪及姻黨爾
家書生爲門世無富貴終不爲汝樹禍自今仕宦不
可過二千石闕婚嫁不須貪世位家時議者以君審

裁將以應軍司之選君遽告蔡謨曰此非輕弱所宜
尸忝羯逆方熾當保國養民以俟事會想愛人以禮
宜寢此言主相聞之卒不授督統之任謨秉君此言
終不唱討賊之計在朝正立不昵權豪及致仕退居
長子髦解職視膳中子謙躬率田桑中外莫不取給
闔門靜軌廿餘年九十三薨遺命素棺薄斂吉凶官
飾一無施列天子嗟悼詔賜墓田諡曰靖侯禮也停
柩在殯鄰家失火三子抱柩號惶分同灰燼焱爛垂
及歟然頓滅論曰君平生素行旣感達幽靈終殯在
堂又獲福異豈神祇保佑以顯淳德乎聞託姻顏氏
頗識舊聞與君二子髦約採集言行而著此傳銘曰

嶠夷導日岱方禋春星離望合水別浸鄰少陽畜德
蒼祇效神孕僊字聖誕智息仁涑上道奧稷下儒淵
乃昔宗林傾席曜筵升門取僑接室稱賢闔則遯哀
燭亦抗宣獷彼琅邪實惟海宇憬屬之罟邪臨潮擁
載濟越師大淹秦旅誰其來遷時聞遠祖青州隱秀
爰始貞居內辟鼎府外康邦閭建節中平分竹黃初
刑清齊右政偃營區葛嶧明懿平陽聰理或薦公庭
或登宰士列美霸朝雙風千里華萼之茂於昭不已
博士淵退再逡儒聘案聘舊誤貞子七穆比世稱盛
無忝汝陰有偉安定舍人致敏亦允儲命靖侯潛德
信豈在明言則測幽歎實聳靈仁親之寶大孝之榮

官必凝績學乃敦經隨難蕃霸特安闔掖扶元陟帝
翼成復辟忌滿裁婚鑿沖貶石望年靜駕樂恬延歷
三祖連光衆門稟教於時列孝克端殊操潔景衡陰
澹心理與任不窮秩是謂高蹈山曾木明冑積芟深
永惟世闕思樹辭林碑表有毀策素匪任誦靈墳阿
長寄風音

晉江夏李闡字宏模傳曾孫宋金紫光祿大夫贈特
進延之字延年銘大歷七年歲次壬子夏四月甲寅
十四代孫唐金紫光祿大夫前行撫州刺史上柱國
魯郡開國公真卿書重建於舊龜趺上建康志顏含
夫西平靖侯顏府君葬靖安道旁考證云晉顏含乃
唐時真卿十四世祖也得古碑於靖安道旁乃李闡

續苑十五

音

及顏延之文墓不知所

丞相桓温碑銘

晉袁宏

文武開業尚父定王佐之契宗周不競桓公宏九伐
之勲脫屣於必濟之功忘懷於屈伸之會高氏特諷
出乎生民公亮坦於萬物遂復改謀迴慮策馬武關
摠轡丹析之塗揚鞭終南之嶺兵交則戰無全敵勸
義則襁負雲集徒以懸軍輕進困蓄靡儲而豺狼懼
殪保固窟穴乃方軌迴轅反師凱入雖奇功大勲未
捷於一朝而宏謨神畧義高於天下惟公秀傑英特
竒姿表於弱冠俊神朗鑒明統備於成德巾褐衡門
風流推其高致忘已應務天下謝其勲業輔相兩儀

而通運之功必周虛中容長而方圓之子咸得道濟
而不有處泰而逾約可謂固天時縱生民之傑者也
銘曰

美盡黃裳道暢伊呂哲人應運命世作輔卓卓英風
畧畧宏宇亮心高列俊神間舉忘已濟物撫化翼世
河洛澄流華梁卷翳俾我仁公宏道作鏡如何不弔
雲巒落映

續古文苑卷第十五

續古文苑卷第十六

賜進士及第授通奉大夫山東通省督糧道加三級孫星衍撰

碑志二

宋臨澧侯劉使君墓誌

曾祖宋孝皇帝祖諱道鄰字道鄰侍中太傅長沙景
王妃高平平陽檀氏字憲子謚曰景定妃父暢道淵
永寧令祖貌稚巖琅邪太守合葬琅邪臨沂莫府山
父諱義融字義融領軍車騎桂陽恭侯夫人琅邪臨
沂王氏字韶風父簡長仁東陽太守祖穆伯遠臨海
太守合葬丹徒練壁雩山所生母湯氏宣城人葬練
壁雩山兄覲茂道散騎常侍桂陽孝侯夫人廬江潯

何氏憲英父愉之彥和通直常侍祖叔度金紫光祿大夫合葬練壁雩山第三弟彪茂蔚祕書郎葬江乘白山今補字夫人河南陽翟褚氏成班父方回太傅功曹祖叔度雍州刺史第四弟寔茂今補字太子舍人夫人琅邪臨沂王氏淑婉父津景源中書郎祖虞休仲左衛將軍合葬今補字江乘白山第五弟季案宋書此有茂通海陵太守葬練壁雩山夫人陳郡陽夏袁氏妙口父淑陽源太尉忠憲公祖豹士蔚丹楊尹第一姊茂徽嬀陳郡長平殷臧憲郎父元素南康太守祖曠思秦口軍功曹重嬀琅邪臨沂王閔之希損鎮西主簿父昇之休道都官尚書祖敬宏左光祿儀

同第二姊茂華嬀廬江灣何求子有祕今補書郎父鎮長宏宜都太守祖尚今補之彥德司空簡穆公第三姊茂姬嬀平昌安邱孟詡元亮中軍參軍案謂離父靈休今補太尉長史祖昶彥遠丹楊尹第四姊茂姜嬀蘭陵蕭惠徽中書郎父思話征西將軍儀同三司祖源之君流前將軍第五妹茂容嬀蘭陵蕭贍叔文父斌伯舊青冀二州刺史祖摹之仲緒丹陽尹重嬀濟陽圍蔡康之景仁通直郎父熙元明散騎郎祖廓子度太常卿第六妹茂源嬀濟陽考城江遜孝言父湛徽淵左光祿儀同忠簡公祖夷茂遠前將軍湘州刺史重嬀琅邪臨沂王法興驃騎參軍父翼之季弼廣

州刺史祖楨之公幹侍忠夫人濟陽考城江氏景嫄
父淳徽源太子洗馬祖夷茂遠前將軍湘州刺史第
一男晃補長暉出後兄紹封桂陽侯第二男旻淵高
拜臨澧侯世子第三男嵩淵華第四男量淵遂出後
第四弟寔第五男口淵穎第六男晏淵平第一女麗
昭第二女麗明第三女小字僧歸亡葬口口
宋故散騎常侍護軍將軍臨澧侯劉使君墓誌
君諱襲字茂德南彭城人宋高祖武帝弟景王之
穆也神姿韶雅風譽夙懋弱冠拜祕書郎逮二凶肆
禍人倫道消君身離幽執僅免虎口事清還復舊職
以母憂去官既除又拜祕書郎轉太子舍人自升口

二宮令望允緝出爲鎮蠻護軍廬江太守莅政平簡
聲績兼著遷明威將軍安成太守屬中流構豐四表
迷逆君英議獨發招會如神故能以一口之旅剋濟
忠節義超終古誠冠當今皇朝欽嘉爵賞取榮除輔
國將軍郢州刺史封建陵縣開國侯俄徵太子右衛
率加給事中未拜遷侍中冠軍將軍改封臨澧縣開
國侯鎮肅石頭實當關要之寄遷左衛將軍未拜仍
除中護軍春秋卅有八泰始六年三月十日薨於位
聖主嗟悼朝野傷悲有詔故中護軍臨澧縣開國侯
志行貞純才用理濟忠勳著於艱時勲績倡乎泰運
年志始壯奄焉凶折悲傷惻割實兼常懷思加寵數

以申哀榮可贈護軍將軍加散騎常侍餘補今如故諡曰忠侯粵五月廿七日庚寅將葬于琅邪之乘武岡以悲幽明之殊隔傷一訣而永分仰清徽而攬淚俵

元石而裁文其辭曰

峩峩山岳效靈允矣君子誕膺休禎支蔭帝宇
緜慶文明德以行高仁與華二宮官政兩服
國步時屯艱難斯屬忠則忘家義實光族朝廼欽庸
以望既歸寵惟或侍帝言或司蕃戎
方采美家邦如何不躬芳稍述
日月有時考辰筮吉元堂啓基深泉永安
案此碑曾祖以下列在題前與北魏崔敬造誌同例餘不多見

宋張氏墓誌

宋故臨渭縣侯湘東太守張府君諱濟夫人丘氏諱靜姬第三女推兒春秋卅有一亡於偏憂元徽元年十月甲辰十七日庚申權假窀穸於西鄉遠葉蘭飛浚源璇潔履順早辰含章妙歲選史圖容循詩範節皎鏡冬泉優柔春蕙濶北悞行營東慙藝冥味慶善宵翳壽仁泣血賣性團憂殲身罷景方旦摧華載春壠木已藹墓草行陳朱火幾爛元夜無晨故永陽敬太妃墓誌銘梁徐勉永陽大太妃王氏琅邪臨沂人也其先周靈王之後自秦漢逮於晉宋世載光口羽儀相屬既以備于前

志故可得而畧焉。祖粹給事黃門侍郎，父儼左將軍司馬，尋陽內史。並見稱時輩。太妃體中和之氣，稟華宗之烈，蹈此溫恭，表茲淑慎。孝敬資於冥發，仁愛口於自然。至乎四教六訓之閑，工言貞婉之德，無待教成，罔不該備。故景行著于中口，淑問顯乎言歸。作嬪盛德，實光輔佐，親縫幕之用，躬服澣之勤。及早世釐居，遺孤載藐，提攜撫育，逮乎成備。斷織之訓，既明闕門之禮，斯洽。劬勞必盡，曾不移志。用能緝睦于中外，亦以^⑤濟乎艱難。雖魯姜之勤節，曹妃之敬讓，方之茂如也。皇業有造，殷憂啓聖，追惟魯衛，建國永陽。恭王纂嗣，蕃號式顯，廼拜爲太妃。策曰：維天監二年六月

月甲午朔十日癸卯，皇帝遣宗室員外散騎侍郎持節兼散騎常侍蕭敬寶策命永陽王母王氏爲國太妃。曰：於戲！惟爾茂德內湛，粹^⑥範外昭。國序凝芬，蕃庭仰訓。是用式遵舊典，載章徽服。往欽哉！肅茲休烈，可不慎歟！備^⑦禴瑱之華，而降心彌約。居千乘之貴，而處物愈厚。旣而恭王不永，禮從^⑧訓導。嗣孫載光，榮祉年高。事重志義，方隆宜承。綏福履而奄奪，鴻慶以普通元年十月廿三日，遘疾十一月九日己卯，薨於第。春秋五十有九。詔曰：永陽大太妃奄至薨逝，哀摧切割，不能自勝。便出敘哀，可給東園祕器，喪事所須，隨由^⑨辦。祖行有辰式^⑩茂典，又詔曰：故永陽大

太妃禮數有殊德行惟光訓範蕃嗣式盛母儀即遠
戒期悲懷抽割可詳典故以隆嘉謚禮也粵其月廿
八日戊戌祔瘞于琅邪臨沂縣長千里黃鵠山用宣
風烈以昭弗朽廼為銘曰
清瀾悠邈其儀尚矣龍光疊照風流世祀猗歟罔匱
於昭不已誕資仁淑作嬪君子幽閑表操明德自躬
推厚處薄秉默居冲參差採芣揜嘆言工鑒昭彤管
識懋休風凝芬載湛芳猷允塞徙舍為訓止閤成則
曹號母儀豈伊婦德穆茲閨闈形于邦國龍飛集運
禮數攸鍾憲章盛典車服有容泰而愈約貴則彌恭
蕃祉方茂纂嗣克重巾帶差池朝夕咸事雖曰任傅

續文獻通考卷之六

五

永請斯備是惟仁姑厥德可庇恂恂濟濟蘭芬瓊祕
光陰易晚祺福難留閨儀罷映綸華奄收奠遷朱邸
駕指行楸芳是勒大方攸尚書右僕射太
子詹事臣勉奉敕撰

丹陽尹湘東王善政碑

梁裴子野

皇上建顯號垂鴻名廣大配乎天地光華象乎日月
長駕遠撫橫逸乎都外策鏡區域充塞乎無垠上冠
九垓旁濟八表制禮以告成功作樂以彰治定福應
允臻祥慶符合六府孔修九官咸事於往歲也有司
奏以湘東王為宣惠將軍丹陽尹既而下車為政振
民育德循名責實舉無遺慮若夫據饋累起求賢如

續文獻通考卷之六

六

不及卑身折節用人若由己玉帛旅於丘園辟書交
乎塗路求餘論於故府想遺風於舊哲延儒生於東
閣命文學於後車重門洞啓列筵廣置四民摠至獄
訟殷集王兼而治之綽有餘裕上宏其禮下悅其風
虛往實歸人得所至由是百吏仰成具僚斂衽千里
之閒有懷必亮躬親勸課賦政授時辨相物宜務盡
地利由是仍歲有秋餘糧栖畝是以縉紳先生愀然
相顧遂造象魏拜而陳之有詔報曰織介之善春秋
必書吏民歸美難用抑絕於是二三君子歡得所奏
乃擇工良匠追石名山撰德選辭興事篆刻俾萬代
之下知斯文之在斯銘曰

茫茫禹迹經啓萬方平秩肇定曰若我皇并苞九域
畫野分疆猗歟帝子日就月將疏爵分品奄有瀟湘
君王光啓旣表南國肇允神童翻飛上德導達元微
優游翰墨行成師範文爲麗則帝曰爾諧出康庶績
勿替敬典大猷允迪我王顯允洵美且麗夙夜乾乾
有隆无替光贊大朝庇民濟世京邑翼翼永承嘉惠
魏故中書令祕書監使持節督兖州諸軍事安
東將軍兖州刺史南陽文公鄭君之碑
公諱義字幼麟司州滎陽開封人也肇洪源於有周
胙母弟以命氏桓以親賢司徒武以善職並歌緇衣
之作誦乎弈世降逮於漢鄭君當時播節讓以振高

續苑十六
風大夫司農創解詁以開經義迹刊圖史美灼二書
德音雲鬣碩響長列揚州以十策匡時司空豫州以
勳德著稱高祖畧恢亮儒素味道居真州府招辟莫
之能致值有晉弗竟君道陵夷聰曜虔劉避地冀方
隱括求全靜居自逸屬石氏勃興撥亂起正徵給事
黃門持節遷侍中尚書贈揚州刺史曾祖豁以明哲
佐世後燕中山尹太常卿濟南貞公祖溫道協儲端
燕太子瞻瞻同事父睦仁結義徒績著寧邊拜建威
將軍汝陰太守繇榮千載聯光百世自非積德累仁
慶屆無窮其孰能傳輝踵美致如此之遠哉可謂身
沒而名不朽者也公稟三靈之淑氣應五百之恒期

乘和載誕文明冠世篤信樂道據德依仁孝弟端雅
寡言愍行六藉孔精百氏備究八索九丘靡不昭達
至乎人倫禮式陰陽律應尤所留心然高真沈默恥
爲傾側之行不與俗和絕於趣向之情常慕晏平仲
東里子產之爲人自以爲博物不如也蘊斯文於衡
泌延德聲乎州閭和平中舉秀才荅策高第擢補中
書博士弥以方正自居雖才望稱官而乃歷載不遷
任清務簡遂乘閑述作注諸經論撰話林數弓弓同
莫不元契聖理超異恒儒又作孔顏謠靈巖頌及諸
賦詠詔策辭清雅博皆行於世也才望見陟遷中
書侍郎又假員外散騎常侍陽武子南使宋國宋主

續齊書卷之六
客郎孔道均就邸設會酒行樂作均謂公曰樂其何
如公荅曰哀楚有餘而雅正不足其細已甚矣而能
久于于均均嘿然而罷移年而蕭氏滅宋雖延陵之
觀昔詩鄭公之聽宋樂其若神明矣朝廷以公使協
皇華原隰斯光遷給事中中書令總司文史敷奏惟
允國之律令是所議定公長子懿邕容和令器望兼
資早綜銓衡能聲微著敦詩悅禮尤精易理季子道
昭博學明雋才冠祕穎研圖注篆超侍紫幄公行於
前吏部祕書隨其後凡厥庶寮莫不欽其人也於時
有識比之三陳後年不盈紀懿給事黃門侍郎太常
卿使持節督齊州諸軍事平東將軍齊州刺史道昭

祕書丞中書侍郎司徒諮議通直散騎常侍國子祭
酒祕書監司州大中正使持節督光州諸軍事平東
將軍光州刺史父官子寵才德相承海內敬其榮也
先時假公太常卿熒陽侯詣長安拜燕宣王廟還解
太常其給事中中書令侯如故縱縱容鳳閣動斯
可則冠婚喪祭之禮書疏報問之式比之制矣民皆
行矣雖位未槐鼎而仁重有餘太和初除使持節安
東將軍督兗州諸軍事兗州刺史南陽公德政寬明
化先仁惠不嚴之治穆如清風旃桑有敬讓之高朝
市無鞭撻之刑卽道之美不專於魯矣太和中徵祕
書監春秋六十有七寢疾薨於位凡百君子莫不悲

國秀之永沈哀道宗之長沒皇上振悼痛百常往遣使贈襚策贈有加謚曰文祭以太牢以太和十七年四月廿四日歸葬乎熒陽石門東南十三里三皇山之陽於是故吏主簿東郡程天賜等六十人仰道墳之緬邈悲鴻休之未刊乃相與欽述景行銘之元石以揚非世之美而作頌曰爰鑒往紀稽覽前徽有賢有聖靡弗應時繇實契姒且亦協姬於穆鄭公誕淑應期伊昔桓武並美司徒恭惟我君世監祕書三墳剋闢五典允敷文為辭首學實宗儒德秀時哲望高世族灼灼獨明亭亭孤邈式胄三雍鄒風再燭作岳河兗澤移草木慶靈長發

繼葉傳光君既挺發元亦含章文義襲軌朱紱相埒刊石銘德與日永揚

永平四年歲在辛卯刊上碑在直南卅里天柱山之陽此下碑也以石好故於此刊之

魏代揚州長史南梁郡太守宜陽子司馬景和

妻墓誌銘

夫人姓孟字敬訓清河人也蓋中散大夫之幼女陳郡府君之季妹夫人資含章之淑氣廩稟懷淑之奇風芬芳特出英華秀生婉問河洲鼓鐘千里年十有七而作嬪於司馬氏自笄笄髮從人檢無違度四德孔循婦宜純佑備奉明姑以恭孝與名接娣姒以謙

茲作稱恒寬心靜質舉成物軌謹言慎行動爲人範
斯所謂三宗厲矩九族承規者矣又夫人性窈窕
如媿多於容納敦桃天之宜上薦小星之遠下故能
慶顯螽斯五男三女出入閨闈諷誦崇禮義方之
誨旣形幽閑之教亦著然盡力事上夫人之勤夫婦
有別夫人之識捨惡從善夫人之志內宗加密夫人
之恤姻於外親夫人之仁夫人有五器而加之以躬
儉節用豈悟天道無知與善徒言享年不永凶齒橫
集春秋卅有二以延昌二年夏六月甲申朔廿日癸
卯遣疾奄忽薨於壽春嗚呼哀哉粵三年正月庚戌
朔十二日辛酉歸葬於鄉墳河內溫縣溫城之西寔

以營原興龔窳野成丘故式述清高而爲頌云

穆二夫人乘和誕生蘭蕪蕙糝玉潤金聲令問在室
徽音事庭方孚洪烈範古流名如何不淑早世徂傾
思聞後葉刊石題誠

魏崔敬邕墓誌銘

祖秀才諱殊字敬異

夫人從事中郎趙國李休女

父雙護中書侍郎冠軍將軍豫州刺史安平敬侯

夫人中書趙國李詵女

魏故持節龍驤將軍督營州諸軍事營州刺史征虜
將軍大中大夫臨青男崔公之墓誌銘

君諱敬邕博陵安平人也夫其殖姓之始蓋炎帝之
允其在隆周遠祖尚父實作太師秉旄鷹揚尅佐撫
殷若乃遠源之富奕世之美故以備之前冊不待詳
錄君卽豫州刺史安平敬侯之子胄積仁之基累榮
構之峻特稟清貞少播令譽然諾之信著於童孺瑤
音玉震聞於弱冠年廿八而雋華茂實以響流於京
夏矣被旨起家召爲司徒府主簿納贊槐衡能和鼎
味俄而轉尚書都官郎中時高祖孝文皇帝將改制
創物大崇革正復以君兼吏部郎詮敘彝倫九流斯
順太和廿二年春宣武皇帝副光崇正妙簡宮衛復
以君爲東朝步兵景明初丁母憂還家居喪致毀幾

於滅性服終朝廷以君膽量凝果善謀好成臨事發
奇前畧無滯徵君拜爲左中郎將大都督中山王刺
史出圍僞義陽城拔凱旋君有協規之効功績隆盛
授龍驤將軍太府少卿臨青男忠勲之稱實顯於茲
永平初聖主以遼海戎夷宣化佇賢肅慎契丹必也
綏接於是除君持節營州刺史將軍如故君軒鑣始
邁聲猷以先麾蓋踐壇而溫膏均被於是殊俗知仁
荒嶠識澤惠液達於逋遐德潤潭於邊服延昌四年
以君清政懷柔宣風自遠徵君爲征虜將軍太中大
夫方授美任而君嬰疾連歲遂以熙平二年十一月
廿一日卒於位縉紳痛惜姻舊咸酸依君績行蒙贈

左將軍濟州刺史加謚曰貞礼也孤息伯茂銜哀在
疾摧號罔訴泣庭訓之崩沈淚松楊之以樹洞抽絕
其何言刊遺德於泉路其辭曰
縣哉遐胄帝炎之緒爰歷姬初祖惟尚父曰周曰漢
榮光繼武邁德傳輝儒賢代舉於穆獻考誕質含靈
秉仁岳峻動智淵明育善以和獎幹以貞響發邅丘
翼起槐庭慶鍾盛世皇澤遠融入參彝敘出佐邊戎
謀成轅幕績著軍功偽城颺偃蠢境懷風王恩流賞
作捍東荒惠沾海服愛洽遼鄉天情方渥蘭爵惟良
如何倉昊國寶淪光白楊晦以籠雲松區杳而煙遂
藐孤叫其崩窅親賓颺而垂淚仰層穹而摧號痛尊

續苑十卷

三

靈之長祕誌遺德兮何陳篆幽石兮深墜嗚呼哀哉

王漁洋居易錄云陳崇石為安平令掘出龍開得祖父名爵列碑題之前

魏故驩驤將軍營州刺史高使君懿侯碑銘

君諱貞字羽真勃海脩人也其先蓋帝炎氏之苗稟
昔在黃唐是為四嶽爰逮伯夷受命於虞舜曰典朕
為太師俾侯齊國世世勿絕表乎東海其公族有高
子者即其氏焉自茲已降冠冕親繼及世濟其德不
實其名祖左光祿大夫勃海敬公純嘏所鍾式誕文
昭皇太后是為世宗武皇帝之外祖考安東將軍青
州刺史庄公有行有礼克荷克構即文昭皇太后之

續苑十卷

三

弟二兄也。君稟岐嶷之姿，挺珪璋之質，清暈輝發於
 載卡。字弄秀悟表乎齟齬，黃中通理之名卓爾。不羣之
 目固已殊異，公族見稱於匠者。至於孝以事親，則白
 華不能比其潔；友于兄弟，則常棣無以方其盛。敬讓
 著自閭閻，信義行於邦黨。若夫秉心塞淵，砥礪名教，
 伏膺文武，不肅而成。則綴軌於前脩，同類規於先達
 者矣。雖綺襦紵袴，英華於王許；龍馬流車，陸離於陰
 鄧。而不以富貴驕人，必以謙虛業己。是故夷門識慕
 蹇步，知歸我德；如風物應如響，弱冠以外戚令望，除
 祕書郎，係麟閣而來儀。瞻石渠而式踐，於是縱容校
 文之職，翻飛鷓鷯之間。容止此而可觀，清風茲焉已

穆既而重離載朗，東朝始建。杞梓備陳，瑤金必剖。僉
 求其可，帝曰：爾諧遷太子洗馬。夙夜惟寅，媚茲儲后。
 仰敷四德之美，式揚三善之功。同禁聯坊，亡有出其
 右也。於時六宮無主，百姓未繫。周爰大邦，罔踰莘似。
 以君赫有神表，淑問拜為皇后。君戚愈重，口愈沖寵。
 日益權日損，由是有少君退讓之風，無長淵驕奢之
 患。故赫赫之望，具瞻允集；楨幹之期，匪朝伊暮。而不
 幸短命，春秋廿有六。以延昌三年歲次甲午四月己
 卯朔廿六日乙巳，遘疾卒於京師。二宮悲慟，九族悼
 傷。同位駿奔，遐迩必至。天子廼詔有司曰：故太子洗
 馬高貞器業始茂，方加榮級，而秀穎未實。奄彫夏彩，

今宅兆有期宜蒙追陟可特贈驩驪將軍營州刺史
以旌威儀其墓丘所須悉仰本州營辦臨塋又特給
東園龍輜加謚曰懿凡我僚舊爰及邦人咸以君生
而玉質至美也幼若老成至慧也孝友因心至行也
富貴不驕至謙也君以此終亦以此始烏可廢而不
錄使來者無聞焉廼相與採石名山樹碑墓道其詞
曰
厥緒皇□□□□□堯咨四岳周命呂望惟高惟國
世有龍光自茲作氏不實其芳於鑠光祿饗茲戩榮
赫矣安東純嘏斯屬或女或妹匪戚伊僕陟彼昭
陽光我邦族山川降祉餘慶不已敬公之孫庄公之

續列世

廿

子如琇如瑩為山伊始人知其進莫見其止古人有
言膏粱難正於乎我君終和且令牧已謙謙與物無
競孝友因心能久能敬爰始來儀濯纓麟沼翮羽儲
局其容皎皎方搏九霄載飛載矯天道如何是人
天生榮死哀禮有加數曷用寵終英英旂輅其人雖
往其風可慕元石一刊清徽永鑄

大代正光四年歲次癸卯管黃鍾六月

魏故懷令李君墓誌銘

君諱超字景昇本字景宗後承始族叔在江左者懸
同故避改云秦州隴西郡狄道縣都鄉華風里人

續列世

廿

也雅著高節敦襲世風言行足師興作成准循情孝
友因心名義安貧樂道息詭遇之襟介然峻特標確
焉之擦弱冠舉司州秀才拜奉朝請除恒農郡冠軍
府錄事察軍事宰沁水縣巨政崇治綽居尤最為受
罪者所誣韞章憲臺誤聽被茲深劾除名為民於是
廿年中浮沈閭巷玉潔金志卓尔無悶到熙平二年
甫更從宦補荊州前將軍騎兵參軍事復作懷令已
受拜垂垂述職遭疾正光五年八月十八日卒于洛
陽縣之永年里宅時年六十一孤貞華首訖於二邑
門從無兩遠迹酸恨懷之百姓長慕喪氣雖陳留之
哀望胡季叡不是過也越六年正月丙午朔十六日

辛酉案此謂正光六年也其六月始改元孝昌則正
錄劉義叟長此年梁正丙午朔魏同決無可疑
而錄師金石遺文乃誤以為在辛後經年凡六於是
王氏萃編遂列為永安二年通也又考司馬景和妻墓誌
丑朔與碑所書絕不二年夏六月甲申朔廿日癸卯下書
銘上書以延昌二年夏六月甲申朔廿日癸卯下書
粵謂三年正月庚戌朔十二日辛酉以其朔求長歷則
此碑書年之法正同又一月三日辛酉以其朔求長歷則
之東南元壤難窮陵谷時異刻茲陰石照序光塵
泱泱顯族斂夢西垂代襲清則沓炳羽儀道妙之門
緒風屬斯惟祖惟考侖儻環竒昌謨迭駕高獲明規
杳量无隄元契不貲摠循異貫員應紛枝灼灼伊君
山立淵淳棲真宅正寢繩履程懿鑠為質醇素用情
均治禮世氣重財輕亦既從招旁溢鴻聲隨牒出入

續范廿六

其

密勿力誠。爰莅近邑。先邁儀形。絕交獨坐。化動陰寔。
尚德貽咎。眾實叵蓋。拂衽歸來。飭轅褫帶。恂恂鄉閭。
萬殊一會。優柔善成。无小无大。垂白再仕。汎尔沿流。
階倫稍降。盛業愈邁。遂作後城。士女承休。鬻頓方
馳。盡土悲愁。尅節炯言。引賞靡徵。端恭妄珉。家俗虛
膺。擢彼圯跡。事罕篇繒。長源未輸。深厝乍卷。蒞此逸
機。空生徒返。茲寬易削。疇毒難遣。楨掬踈竦。泉泉房
寒遠。孀孤內爛。妹弟摧咷。式鏤沈石。託注幽篆。
妻恒農楊氏。父談爲邾州主簿。息女孟宜。年卅六。適
恒農王始。僂郡中正。息女媛姿。適遼西常彪。侍御史
息女仲妃。適武威賈子謐。涼州治中。息道冲。息女婉

三 華息女休顏。息女四輝。息道逸。年十六。息道栖。年十

魏故假節督齊州諸軍事輔國將軍齊州刺史
高公墓誌銘

君諱湛。字子澄。勃海滌滌人也。靈根遠秀。啓慶兆於
渭川。芳德遐流。宣大風於東海。作範百王。垂聲萬古
者矣。故清公勢重。鄭伯捐師。元卿位尊。管仲辭禮。皆
所以讓哲推賢。遠明風軌。祖冀州刺史勃海公文照。
昭武烈望。擢中夏。惠沾朝野。愛結周行。考侍中尚書
令司徒公。英風秀逸。僂氣雲馳。虬顧帝鄉。威流宇縣。
君稟慶緒。於綿基。挹餘瀾於海澳。幼尚端凝。長好文

續范
三

雅非道弗親唯德是與道遙儒素之間慕申穆之遺
風俳佻文史之際追牧當作馬之逸藻至於彈春灑
翰席作席字或非月抽琴邁昔哲以孤遊超時流而獨
遠熙平啓運起家為司空參軍事轉揚烈將軍羽林
監天平之始襄城阻命君文武兩兼忠義奮發還城
斬將蠻左同歸朝廷嘉其能縉紳服其義假驩驥將
軍行襄城郡事君著績既崇賞勞未允尋除使持節
都督南荊州諸軍事鎮軍將軍南荊州刺史於時偽
賊陳慶率旅攻圍孤城獨守載離寒暑終能剋保
邊隍全怙民境復除大都督行廣州事享年不永春
秋卅三元象元季正月廿四日終於家皇上動哀能

言灑淚迺有詔曰故持節都督南荊州諸軍事假鎮
軍將軍揚烈將軍員外羽林監行南荊州諸軍事南
荊州刺史當州大都督高子口金石萃編云此碑完
善其損者僅語中
臨難殉軀奄從非命言命遺績有悼于懷宜申追寵
式光往烈可贈假節督齊州諸軍事輔國將軍齊州
刺史粵元象二年十月十七日遷葬於故鄉司徒公
之塋千秋易往萬古難留故鐫石泉門以彰永久其
詞曰
丹蚪降祉姜水載清大人應期命世挺生垂竿起譽
罷釣流聲經綸宇宙莫之與京允司下蕃公衡上宰

既顯營丘，復擲東海。四履流芳，五城降綵。繁柯茂葉，傳華無改。伊宗作輔，忠義是依。清盪昏霧，橫掃塵飛。日月再朗，六合更暈。暉玉帛斯集，福祿終歸。仁壽無遠，積善空施。風酸夏草，霜結春池。崑山墜玉，桂樹摧枝。悲哉永慕，痛矣離長。當作長離山左金石志云離長倒書碑未改正

大齊鄉老舉孝義雋脩羅之碑

唯皇肇祚，大齊受命。引軒轅之高宗，紀唐虞之遐統。應孝義以改物，揚人風以布則。於是緝熙前緒，昭顯上世。雋敬字脩羅，鑽土萇安。食菜勃海，前漢帝臣。雋不疑公之遺孫，九世祖朗。遷官於魯，遂住洙源。幼傾乾蔭，唯母偏居。易色承顏，董生未必過其行。守信志

忠投杼，豈能着其心。捨田立寺，願在菩提。酸味養僧，纓絡匪悛。路救濟飢寒，傾囊等意。少行忠孝，長在仁倫。可欽可美，莫復是過。蓋聞詮賢舉德，古今通尚。隱秀葬才，錐囊自現。余等鄉老，壹百餘人。目曠其事，豈容嘿焉。敬刊石立樓，以彰孝義。非但樹名今世，亦勸後生。義夫節婦，詔令所行。其辭曰：

恭恭易色，免受承顏。孝同曾閔，行比丁蘭。待如握髮，接若吐瀉。酸味救飢，解褐濟寒。披幽釋古，奉敬如來。割已施造，傾力捨財。終終微之念，其性可哀。鑿石壹朝，千代美哉。流芳萬古，迹絕當今。庶勸將來，誰不肅心。忠孝之外，任世浮沈。絕筆刊功，志畢松林。朱陽再

現相訖南金訪石鏤文永保余心懸宗殞轉放筆留

音

皇建元年歲次庚辰十二月戊寅朔廿日丁酉訖功

碑以乾隆乙卯年九月得于泗水縣東五十里韓家澗天明寺側

朱岱林墓誌

北齊

朱敬脩

君諱岱林字君山樂陵濕沃人也自辛朝喪曆昌戶
衍書親以建社賢亦啓國扶封於邾公加茅土方曹
析壤媿魯稱雄別有由謚立姓因字爲氏斯卽去邑
從朱蓋是殊方共致卯金則司空佐命當塗卽領軍
贊業整在晉嗣美表於趙垂名所謂杞梓繼生公侯
閒起哲人世挺衣冠代襲曾祖霸儒該上素術盡從

橫魏使持節平州諸軍事安遠將軍平州刺史俗隣
壘場布以威恩醇酒空陳夜金不受於後謗言及樂
讒巧亂鄒儵尔鷹揚翩然鵠起擁鄉里三千餘戶來
逝河南值元嘉之末朝多喪亂不獲其賞仍居青州
之樂陵郡祖法宏下帷耽藝閒靜自得舉秀才釋褐
南平王府行參軍遷尚書祠部郎中禮閣有聲含香
擅美後遷司徒府諮議參軍事亡贈鴻臚卿父孝祖
清規勝範地美才高俄而魏高祖孝文皇帝熊羆覽
騁蒼兕爭先化洽江湘令行天下錄竒異於巖藪訪
隱逸於閭閻起家除樂陽縣令轉北海太守流涕孟
侯歌謠稚子從今勤古並駕分駟君膺茲秀氣稟是

淳和三案山左金石志誤棘六里方珠比玉左智右
賢擬龍齊鳳得嗟蔡子見重侯相聿始十餘身雖艱
苦晨號夕踊柴毀骨立遂使鳩來栖集馬倭芻草精
通飛走捺貫幽明魏廣陵王愛善如蒼好書比德俾
侯南服妙選英佐託以金蘭徵爲國常侍辭不獲已
俛僊從職而侯羸荷盼難交公子介推逃賞終遠晉
交未踰十旬還以病解後彭城王又以皇枝之貴作
牧東秦召爲主薄久而從命王藉甚有素不苦抑遣
終遂干木之心乃申安道之志君雅量之地無際可
尋元昆季弟推之京宦同於得喪等槩榮枯含章韜
綵藏明晦用兄元旭散騎常侍出除南兗州刺史弟

叔業通直散騎常侍左光祿大夫高冠映日長戟陵
風譽滿京華聲馳寓縣縱趙孝之讓禮食曾何足云
魯恭之就不名詎堪方此魏廷慰卿崔光韶侍中賈
思伯並聰敏當世器局樹時結四子七賢之交飲醪
投水之密留連宴熹付寫矜期黃門郎徐紘與君意
得言忘處權居要恒思不次之舉還疑志不可奪醮
言之暇聊申微旨君荅云昔人有以術忤帝或道質
■王譬之鱗羽本乖飛伏而平生庸短末希簪紱如
斯之貺乞不加己紘愛人以禮兼相欽尚從其所好
不敢熱維普泰之季水德不競蒼雲蓋野紫日生天
烏合蟻徒聚三齊之地豎牙鳴角擗十二之險不異

井中虛言聖出何殊轍■妄号神人拔本塞源摧蘭
天桂春秋五十有四遐迩悲噫聞見涕零惟君大度
不羣峻■孤上託宿假道唯仁與義規矩成則物我
兼忘非夷非惠不石不玉惻隱同於子魚友悌侔於
伯雅何忽儋此案山左金石志缺山石折智士遽傾以
大齊武平二年歲次辛卯二月乙卯朔六日甲申葬
於百尺里東五里第四子敬脩自惟羅此荼毒眇然
咳幼離奇以生龍鍾而立窮而匡子温慙閔騫岵山
難陟過庭無訓攜鋤而感言下集冠之禽攀松弗昭
靈降成墳之鳥空追士季瞻像載興傷慟日殫觀狀
益增酸哽磬茲鄙拙式序徽猷思與泣俱文兼涕落

先言多不備述往行盡是闕如良由才非作者情隈
蕪次從父兄敬範史君伯第三子脫畧榮華不應徵
聘沉深好古尤工摘屬勒銘黃壤以播清風辭曰
本自高門世資陰德從來位重人兼才識運海鱗奇
搏搖翅力繁枝不已清瀾焉息其唯祖英毅唯父深
沈飛纓鳴玉作範垂音仍生東箭遂挺南金素榮俱
美出處分心其有應純和■望餘耀嵇風阮德梁遊
大鈞認于君子藝才何劭闕里儒英瀨鄉元妙其道
王天崖志輕人爵菊藜危坐■裘採藥楚漢兒戲仁
雄寥廓我如曾閔何論許郭其虛言輔善實驗無親
石佳既落儋山亦淪少微之應遂屬高人悲王難序

痛霍何陳其五仁厚慶鍾育斯才彥歷階武日過庭鯉
盼似鳳方鳴如龍比綯遺孤在笈藪焉誰見其六誰見
伊何慈顏弗覩朝不食隣人罷祖比學西河擬文
東魯述彪者固情深陟岵其七魚山本志門豹遺風丹
青已寫元空方崇思人下淚瞻蓋悲空山川不易規
猷詎終其八嗟嗟猶子瞻儀在昔荷恩惟訓依稀如覲
頌雅因詩宏文託易追思素道敬鐫元石

北周王通墓誌銘

公諱通其先太原人也粵乃仙嶽含靈毓禎圖而錫
爵誓淮分淑應寶錄以開宗是以三公列而更榮五
侯封而載錫自茲厥後英髦不墜祖明濟郡中喉舌

識度冲敏志業詳確父增隨州主簿鑒履清致器量
貞遠公養志中和資靈上德趨庭學禮立身之道自
宏步月開襟讓客之風已遠中為令德遊藝依仁賞
逸閒居不希榮祿既而門巢結叢百年之運已催楹
夢起祚九泉之路俄涉春秋六十有三邁疾終於私
第嫡子脩文脩禮衰絰露節痛結寒泉粵以大周天
和二年冬十月之於東城縣東五十里崇德鄉平原
禮也東漸巨壑波濤混濊西望層山烟霞出沒頌德
音而不朽感生靈之倏忽其詞曰
惟鎬建官惟唐命職允文允武克岐克嶷開國承家
禮儀不忒皇天無親誕生哲人摠衣問道好古日新

如何不淑奄喪斯文前臨叢薄後眺荒丘風搏素蓋日慘丹旒庶銘明德永播芳猷康熙九年秋河間縣東城鎮大水有古墓

此碑得

大隋車騎秘書郎張君之銘

君諱景畧燕州上谷人漢司徒華之後也帝皇布護將相蟬聯備諸圖史其可伊述祖驃騎大將軍第一領民酋長文城公又遷燕州諸軍事燕州刺史考龍驤將軍諫議大夫奉車都尉行濟安郡太守金鄉侯君質如披錦文彩煥然器若珪璋光輝朗潤於是弱齡表異聲振朝野欲止不能遂被微辟起家為魏帝內侍左右尋遷秘書郎優游鳳沼去來麟閣時稱獨

步寔曰無雙又加車騎大將軍開皇十一年正月六日冥不蠲德奄從運往春秋六十有八以其月二十六日遷窆於相州安陽河北白素曲未極丞相之年俄掩將軍之墓嗚呼哀哉乃為銘曰昔年慷慨拖紫垂青岷山漢水玉潤珠明何啻大運混我賢貞一辭身世百代千齡

玉泉寺智禪師碑

隋皇甫昆

蓋聞乾元資始三辰著象於天坤道資生萬物動行於地皇王于是建國賢聖所以垂文起名教而莫同制威儀而有別至於畫卦觀爻蓋取隨時之象綜經織緯口通為政之辭大禮同和大樂同節安上治民

續苑六

書

移風易俗斯乃生前之事畧矣可言死後之間仲尼
弗語縱使絳雪縈空元霜拂樹餌金丹而九轉吞玉
髓而千年乘雲也駕五色之元龍遊漢馬控三山之
素鷁逍遙瑤臺之上容與珠闕之間未窺解脫之門
終趣蓋纏之境唯正覺淵沖真如妙有不生不滅無
相無言隨緣應質則口口成形隨類觀音則因聲亦
說故有白銀千尺之口口金丈六之身八部般若之
文四種悉檀之義神通自在慧力無窮因導化行開
示悟入皈依者盡發菩提迴向焉普登常樂是以獼
猴建塔遂生切利之天野鴈銜華復性彌陀之國豈
直日藏沙門孤遊正道月光童子獨見如來四生因

茲度脫六道藉此超蘇實火宅之高車昏河之大筏
若乃周室昭王之世影奪恒星漢朝明帝之時光夢
如日使旋西域化漸東都宣像南宮申心北面自摩
騰入洛羅什遊秦名教更宏道風斯熾經臺像閣寶
塢香山麗溢巖阿綺盈都邑豈期後魏真君之歲後
周建德之年靈廟一除伽藍再滅形容廢毀文字散
遺響落瓊鐘聲沈寶鐸修禪者舊卷其舌而不談護
戒先賢改其形而晦影世絕調心之路時虧汲引之
途無出世之津梁失生民之大望我隋皇帝乘乾御
宇握鏡披圖友愛蒼生君臨赤子天地同其大德日
月合其重光鼓之以雷霆運之以風雨除暴亂致太

平張四維朝萬國功成作樂治定制禮正道無爲區
寰有截闢泥洹之路開般若之門宣十二分之經流
四千年之法精勤耆舊捨俗歸僧淨住初童持心秉
戒非直法輪再轉法鼓還鳴四海於是無虞兆民因
而有賴委羽乘毛之國慕風化以來庭靈禽嘉貺之
祥應圖書而萃苑巍巍也非境智之思量蕩蕩乎豈
言談而能盡玉泉寺者基此山焉智顛禪師之卜居
也敕旨正名著額其山嵬嶸峩嶷嶠嶠峩嶷峩嶷峩嶷
蓋巒似覆船巨石窮竒之象洪崖譎詭之形岡曲抱
而成垣水縈洄而結乳口口口口口口口口口口口
開日月爲之蔽虧霄液由之散聚前瞻江路卻望荆

岑左帶昭丘右通巴峽禪師本姓陳氏潁川人也少
稟生知童真剃落從師南嶽蘊道天臺睿智洪才之
響非直播於江南知機妙辨之聲固已聞於河朔皇
帝■子太尉公晉王性稟孝慈情包惻隱能臣能子
匡國匡家蘊神機之智垂汎愛之心布君子之心偃
生民之草往以僞陳納版受律行師策妙指縱威稜
江海遂剋定金陵化平銅柱三吳霧卷百粵塵清師
乃因王利涉王遂因師受戒師至此而投院王奏聞
而起寺於是異域才情之客慕其道而雲臻他鄉鍊
行之僧味其風而雨集師精研道理盡意談元語證
禪支心開定本幽宗博義若挹海而無窮辨句清辭

似懸河而自瀉居朋之友雖盈量以爭販處少之徒
從窮崖而莫反爾乃信心檀越積善通人咸施一材
俱投一瓦憑茲衆力事若神功營之不日而成飾以
經時而就層臺迴閣復殿連房寒暑異形陰陽殊制
雕簷繡拱與危岫而爭高巖礎鐫基共盤巖而等固
風光出其戶曠雲霧生其棟梁華炫耀於金盤氣芬
芳於玉樹工圖相好湛若金僊匠寫真容凝如滿月
殿起三層之柱簾懸自響之鐘堂開千葉之華蓮捧
飛來之座燈光不滅灌海逾明刹柱俱低承幡自舉
吉祥柔滑之草爛熳依庭送風和氣之香氤氳滿院
斜通洞穴直柱凝泉色似琉璃味同甘露波投鼎

浪瀉陞堂飲腹消疴洗軀愈疾石柱銅梁之狀影如
蓮池桃源菊浦之華香浮柰苑可謂山類耆闍寺同
離越似龍宮而出見疑鹿野以飛來竊以前王鑿鼎
惟論體國之功今共刊碑永記菩提之道余任宰屬
城寺居所部文雖寫意書不盡言其詞曰
二儀開廓四氣氤氳方以類聚物以羣分通賢通聖
明后明君隨機設教觀化垂文樂章旣造禮儀方制
定此親疏流茲疑滯披圖辨物屬辭明例唯化一生
不論三世元都玉簡紫闕銀經解尸遺骨飲液吞精
乘龍萬紀控鶴千齡終非實相猶是塵情唯有大雄
湛然常住不生不滅無來無去千門妙音一音演諭

度脫衆生，涅槃雙樹。夢通劉后，感應姬王。恒星掩耀，
滿月澄光。寫形東國，指聖西方。慈悲願海，善逝津梁。
法顯還晉，摩騰入洛。花散經臺，香流像閣。釋教鬱起，
桑門盛作。露泣珠幡，風吟寶鐸。真君建德，運鍾滅道。
淪沒四生，毀除三寶。我皇啓聖，德侔蒼昊。妙法更宏
真儀再造，陳氏僭號。王赫斯征，勾吳霧捲。閩越廓清，
因逢智者，延謁山庭。珠生浮漢，玉出口荆。華峯岬屹，
石洞淵懸。芬芳菊浦，滴瀝瓊泉。盤渦似谷，覆嶺疑船。
來儀晏坐，觸地蕭然。妙辨悉檀，深窮般若。緇素雲會，
挹其河瀉。或施之材，或投之瓦。經始不日，翻成大廈。
更起龍宮，還閣鹿野。山連紫蓋，江抱黃牛。西臨月峽，

東接昭丘。春牕夏牖，水殿山樓。旃檀圍繞，琳碧還周。
塵吐芙蓉，龕懸石鏡。白毫相好，紺髮輝映。銀鷲徘徊，
錦鱗游泳。騰猴心靜，怖鶚影定。猗歟哲王，命也蕃屏。
自天生德，孝誠俱秉。旦奭非儔，閒平詎并。出總連轡，
入調鐘鼎。構此伽藍，實資力請。魔殿巉巖，須彌鬱律。
倏覩劫終，俄看燒訖。豈如彼岸，生死皆出。金石不朽，
天地可畢。鐫勒巖阿，永垂懋實。

續古文苑卷第十六

續古文苑卷第十七

賜進士及第授通奉大夫山東通省督糧道加三級孫星衍撰

碑志三

大唐左屯衛將軍姜行本勒石紀功碑

昔凶奴不滅寶將軍勒燕山之功閩越未清馬伏波
樹銅柱之迹然則振英風於絕域申壯節於異方莫
不騰茂實於千秋播芳猷於萬古者乎大唐德合二
儀道高五帝握金鏡以朝萬國調玉燭以馭兆民濟
濟衣冠煌煌禮樂車書順軌扶桑之表俱同仁化所
占濛汜之鄉咸暨苑天山而池瀟海內北戶以靜幽
都莫不解辮髮於藁街改左衽於夷俗高昌國者乃

續古文苑卷第十七

是兩漢屯田之壁遺兵之所居。麴文泰卽其苗裔也。往因晉室多難，羣雄竟馳中原之主，邊隅遂隔，閭閻戎狄竊號稱王。歷至今，靡聲教自皇威遠被，稽顙來庭。雖沐仁風，情懷首鼠。杜遠方之職貢，阻重譯之往來。肆豺狼之心，起蜂蠆之毒。黎庶賊殺無已。聖上愍彼蒼生，申茲弔伐。乃詔使持節光祿大夫、吏部尚書、上柱國、陳國公侯君集，交河道行軍大總管、副總管左屯衛大將軍、上柱國、永安郡開國公薛萬均，副總管左屯衛將軍、上柱國、通川縣開國男姜行本等，爰整三軍，龔行天罰。但妖氛未殄，將軍逞七縱之威，百雉作固。英奇申九攻之畧，以通川公深謀

閒出妙思，縱橫命前軍營造攻具，乃統沙州刺史上柱國望都縣開國侯劉德敏、右監門中郎將上柱國淮安縣開國公衡智錫、右屯衛中郎將上柱國富陽縣開國伯屈昉、左武侯郎將李海岸、前開州刺史時德衡、右監門府長王進威等，並率梟雄，鼓行而進。以貞觀十四年五月十日，師次伊吾。時羅漫山北登黑紺所，未盈旬月，克成奇功。伐木則山林殫盡，叱咤則川谷蕩薄，衝梯蹙百，冰釋機檜一發，千石雲飛。墨翟之拒無施，公輸之妙詎比。大總管運籌幃幄，繼以中軍鐵騎，亘原野，金鼓動天地，高旗弊日，長戟彗雲。自秦漢出師，未有如斯之盛也。班定遠之通西

域故迹罕存鄭都護之滅車師空聞前史雄圖世著
彼獨何人乃勒石紀功傳諸不朽其詞曰
於赫大唐受天明命化齊得一功無與競荒服猶阻
夷居不定乃拜將軍殄茲梟鏡其六奇思羣雄逞
力陣開龍騰營麗星光旗明日色揚旌塞
表振威西極其峨峨峻嶺眇眇平原塞雲暝結胡風
書昏高樹銘功讚德
貞觀十四年歲次庚子六月丁卯朔廿五日辛卯立
瓜州司法參軍河內司馬
碧落觀碑
唐李訓
有唐五十三祀龍集敦牂哀子李訓誼讓謙銜恤在

疾寘懷靡所永言復鄭釋德思樹良因敬立大道天
尊及鄭釋侍真像粵若稽古藐觀遂初真宰貞乎得
一混成表於沖用元之又元蹟超言象之域惟恍惟
惚理冥視聽之端是以峒山順風勞乎靡索汾陽馭
御釋辯窅然自喪曠矣哉道之韞也其寄於寥廓之
場焉至於玉笈宣徽琅函吐祕方壺神闕蒙穀靈遊
倏忽九陔導飛廉而從敦圉俯仰六合戴列星而乘
雲氣固亦昭章逸軌胥嚮孤風潛研堂跋化其瞭幽契無爽
伏以先妃含貞載德克懋瓊尾釋儀延慶台華
正位藩閫動容資於典禮發言光乎箴訓故紘紼是
蕭粲盛無違大當叶曜中閨以睦況倚閭分甘之澤

徒居側眇之規義越人倫恩深振古重以凝神道域
抗志澄源淮館儀僊操山參釋鴻寶之靈術楚壇敷教
暢微言之盛範儒元兼洞真俗兩該德冠母儀事高
嬪則豈圖昊天不惠積善無徵咎罰奄鍾茶蓼俄集
訓等痛纏過隙感切風枝泣血攀號自祈鄭釋慎殞
祇奉嚴訓慈鄭釋勉備隆偷存視息遄移氣序几筵
寂寞瞻望長違創巨徒深寄哀何地所以貪及建鄭釋
餘漏祈福元宗敬寫真容庶幾終古而土木非可久
之致伊鄭釋鎔鑄為誨盜之先肅奉沖規圖輝貞質晬容俶
彩若琳房之可觀霓裳交映萃鄭釋駕其留帝晨飾

翠雲之宅美鄭釋香童散朱陵之馥載彫爰戰式展
祈以此勝因上資神理伏願栖真碧落飛步黃庭謁
羣帝於天關攜列仙於雲路融心懸解宅美希夷但
注鄭釋儀鄰以同洞鄭釋奐指乾坤而齊極介茲多祉藩
度惟隆如山作固永播熊章之祿鄭釋循陔自勗冀
申烏鳥之志孔明在鑒匪曰道遐昌言嗥潛研堂跋
闡庶其鄭釋無拔昔人銜哀罔極鉛槧騰聲柔疑鄭釋
紛克劭義切張憑之誅至德興思痛深陸機之賦况
清輝懋範宛若前蹤瞻言景行敢忘刊紀餘魂弱喘
情不逮文謹託真猷直書心事音儀日遠風烈空傳
敬鄭釋心感慕終天何及此碑有咸通十一年鄭承

續苑十七
續苑十七
續苑十七

唐宋州司法田君墓誌銘

君諱宏敏其先北平人也自虞承帝錄派媯汭之神
宗陳恒制齊遂開國而為姓若乃錫土隆家之美贊
玉帛於緇圖陳規獻策之謀著英猷於寶牒祖由玉
山齊暎瓊萼流芳器纍瑋璋質懷杞梓韞劉龍之英
美躍管驥之高衢彩匣韜輝金章絕韻詞林振穎筆
海浮瀾秀氣烟高靈規聳見貞風槩俗勁節澄襟被
揚歷而見徵應翹車而入聘隨章武郡功曹父恭藍
田孕質驪穴騰輝志岸冲清器該博物雄材雋狀巨
孔伋以逾高雅度汪深湛黃陂而彌浚名馳刈楚德
洽重筵隨高陽縣尉君英靈迴秀壯志遐

韞雄

圖蘭風特振貞明絕俗雅道淹通藻駕雕龍聲充振
鷺清辭雄辨陵鬪子之卿唇逸氣高談鄙蘇張之緩
頰洞該物務統六隧於周邦備曉公方館四人於鄉
邑既而莫楹遺孽夢豎延凶寢疾彌留俄傾薤露以
承_○元_○年九月十二日歿於私第春秋六十有四豈
謂展谿掩耀悲隙影之無留積玉沉輝泣清川之永
謝以口口元年正月二十二日遷窆於任丘縣西南
五里本鄉禮也其地東連博陵西叩金堤膏腴控其
前平林亘其後嗣子務仙嗣孫神傑神冲承族等撰
蓼莪之巨痛陟霧帖而長號扳罔極之哀荒抱霜荼
而永泣恐以炎飛岱嶺庶梓域之長存岸谷遠遷冀

續前

五

松區之尚在其詞曰
承芳軒胃分裳陳成建邦啓土代襲英聲降生明哲
雋又馳名高軌運流景命乃傾誅生前之茂績刻嘉
號於泉局

大唐懷州河內縣木澗魏夫人祠碑銘

唐路敬淳并序

蓋間元圃青宮仙客於焉來往丹丘紫府羽人之所
棲集徵祕籙於淮王時逢八老採神奇於魏帝取觀
雙童子喬控翮翱翔赤霄之上琴高擾鱗游泳淥波
之下斯並心符寂菴神契窈窕匪塵俗之能羈簪纓
之所屈者矣茲有鮫容雅質貞規淑態韞真氣於閨

房挺仙才於閭闔嫦娥採藥奔月朏以含精靈媛投
壺睡電光而吐耀漢皋游女持珠對南國之賓洛浦
神妃鳴玉俟東藩之后莫不名芬紫翠道標黃白列
眞非一往往致焉魏夫人者卽是晉劇陽侯任城魏
陽元之女也本傳曰夫人年二十四適南劉幼彥幼
彥爲修武令善爲德政仁風惠著時夫人隨在修武
之館焉雖魏同舍縣內常齋于別寮季冬之夜半
聞空中有鍾鼓笳簫之聲羽旂光耀降夫人之靜室
輦輦被服非人所聞見有四眞人告夫人曰大帝勅
我來教子以神眞之道注子於玉札應爲紫虛元君
上眞司命名山之號封南岳夫人後爲洛陽山成眞

人因爲立祠土俗號阿夫神原夫鎬京疏社公高克
勤於小物參墟命族畢萬連休於大名丞相之匡盟
漢庭比蹤蕭邛司空之弼諧晉室方譽裴山積德攸
鍾餘慶斯在況復彤雲授彩衍豐谷之靈苗白水開
源導春陵之茂族乘龍合好鳴鳳于飛結大義於絲
蘿諧佳音於琴瑟劉氏絃歌作吏同墨臨人惟彼外
持爰資內輔服勤慕組良毗製錦之工肅事蘋蘩且
佐烹鮮之術猶以爲六法四行豈離夢幻之場九轉
三仙方出塵勞之境朱庭翠閣事甚樊籠元鬢紅顏
理同泡沫於是撥煩疏黷練志凝魂潔成道室之階
列竟師門之宇悠悠永夕紫煙昇而庭院虛凜凜窮

陰元霜冽而池館靜乃有仙鍾簇韻如發漢鯨法鼓
揚音似棲吳鶴簫聲寥亮仍苻弄玉之臺笳奏淒清
有異文姬之殿綠輶朱節眞衛相趨霞佩雲裙仙儀
在列昔安公之治叶冥契於昇龍木羽之鄉應祥期
於御馬眷茲元感異代同苻故能迴驚三清高超八
會持法印而含元氣合眞符而昇太極金記五千職
隸九元之史玉言十萬名彰八素之書足使上元夫
人慙其嘉号元妙玉女媿其芳聲豈與夫障日巫山
薦枕蓆而通窺順風江澳懷環珮而申贈復有躍魚
酬惠愛鳥遺灾清溪白岸之姑阮氏絃生之儷若斯
而已矣夫以王母旣集西漢列其霄筵帝子斯臻北

洛歌其夕漲是用恢勝宇創祠壇想希夷其若存庶
恍忽其無味建立之始年代莫詳爾其周晉名區覃
懷奧壤蘇子攢茅之域寇君剖竹之郊孟津南注控
河流於馬頰太行北指啓山路於羊腸川原相屬風
煙交會鬱彼仙觀揭焉中立綵之以丹青陳之以藻
繪效靈妃之啓齒圖殷女之練色行亭三襲俯瞰川
湄茅攔四注却連山阜巨石崔嵬像蓮峯而特秀奔
泉澗酒瀉松澗以飛湍微靄觸而流津清飈激而成
韻瓊桃仙棗散綠垂紅珠寶金條含細佩紫八林芳
桂凌冬霰以揚葩五株仙杏負春晞而布葉莫不夾
戶蘿生垂簷接蔭可以返魂駐寄忘憂愈疾至若吉

日良辰高人勝士黃紵紫綬忘貴賤而同歸白屋朱
門混榮枯而畢萃敬而不黷誠稟訓於懷柔感而遂
通諒虔心於正直於是採蔬東海折菓西山傾玉酒
而泛流霞酌金漿而挹甘露神交妙有想白鳳之來
儀道契虛無佇黃雀之爲使丹梯可躡必超上漢之
練馭斯越無生之浪誠洞真之苑圍靈寶之
區域者焉秋官尚書檢校懷州刺史南陽鄧府君道
光天爵慶發地靈蹠泰階而高視寔撐天而騁力題
劔昇朝秉形之寄攸重佩金增秩仰福之任逾隆長
史隴西李知人司馬南陽鄧楷河內縣令鉅鹿耿仁
惠或展驥亨衢化康邦國或割鷄遊刃功茂邑民思

靜力於迴天，獸勞生於寂地。識明元，扎跡寄道樞。半
刺毗藩，則晨趨飛其鶴嶺。一同作宰，則元會降其鳧。
為每慮陽軼再旬，具虔馨於斯谷。陰衢潔朔，薦行潦
於茲巒。縣令仁惠，稟氣孝恭。祭則神饗，天然感物。祈
必靈歆，所請甘霖。未迴車而降澤，但求膏液。迎舉意
以零滋，彌媿神之厚恩。故勒銘而旌德，而碧落清窗。
顯在百城之次，椒庭桂門。近臨千室之中，瞻石梁而
靡闕。仰瑤臺而何遠，天降仙成宅。西岳紀桓譚之賦，
尋真起詠南溪。聞郭璞之詩，是以輕率下民。仰追前
列，寄諸貞琰。題其頌云。
畢筮初占，係復其始。窳門有相，甥膺廟美。珠胎孕寶

玉仙昭祉，寔唯靈媛。嬈君子，取譬鸞鳳。言邊魴鯉，
早明八素。夙悟三元。呪神爭術，滄蓬募仙。紫書題記，
白簡開編。暫遊芝圃，倏見華田。輕飛起月，高訓垂煙。
戒遵靈壇，載規神宇。却倚巖壁，前臨澗浦。偃蹇雲棟，
清冷風戶。怪石竒木，鳴蟲嘯羽。居茲地聖，坐同天柱。
瀆妃去魏，弄女辭秦。陽臺之下，暮雨稱神。洛川之側，
朝霞韞真。窈窕高蹈，寥廓上賓。思道業，用述微塵。
大唐垂拱四年正月五日建。宏文館學士路敬。涓製
勝果院僧從謙書。

大唐故朝議郎行澤王府主簿上柱國梁府君
并夫人唐氏墓誌銘 并序 唐 梁朱賓

君諱寺字師陳雍州藍田人也。不承帝緒，自雍墟而
逮夏陽，克勤王家，由安定而宅京兆。其如葛氏昆季
列於三方，有類林家昭穆，光乎十德。至若衣冠禮樂
之盛，烈廉孝賢良之儀表，固以鳥奔當代，昭彰季葉
者乎。曾祖遵周秦州清水縣令，遽賒相用，勞逸兼資。
重泉之磬，載昌單父之琴。斯洽祖殊，隋監門錄事參
軍德以潤身，學以從政。八屯由其式序，五校於是克
隆。父柱，皇朝奉義郎騎都尉，識量夷雅，風神耿介。青
田表秀，丹穴摛祥。進而不榮，安乎散列。退而不野，鄰
乎湫隘。君承積善之餘祉，挺生人之上姿。因心而好
孔墨，抗跡而齊曾閔。縱王佐之奇表，揚于王庭。屈公

輔之宏量，薄遊公府。咸亨四年，授文林郎。班例也。日
者東風爽候，西旅不庭。三軍乏坐甲之資，七萃興懸
磬之歎。君散陶凝慮，指困推誠。躬親餽餼之勞，式周
儲峙之務。恕已及物，下布人謠。憂國忘家，上紆帝念。
永隆二年，恩詔授上柱國。道光西漢，已極武功之尊。
名冠南荆，竟保昭陽之貴。既而上僊興慕，下代纏哀。
梁山降白鶴之祥，畢陌啓青鳥之兆。君悲深考逝，義
切子來。茂績顯於園塋，豐功徹乎旒展。垂拱元年，授
朝議郎行澤王府主簿。以枚馬之英規，偶閒平之上
邛。英風扇乎蘭坂，茂躅隆乎桂山。東閣由是希聲，西
園以之藉甚。豈期攝生謬理，與善失常。西山何高，未

接仙童之羽南溟尚遠翻墜化鵬之翼以垂拱四年
十月五日終於長安懷德里第春秋卅有一夫人晉
昌唐氏名惠兒後魏驍騎將軍本郡守契之七葉孫
卽故司農寺長樂監敏之第二女也巫山降祉異位
摘精挺琬珍以成姿懷冰霰以清慮慕蔡組織維之務
早擅女工幽閑婉嫵之規夙彰婦德恭謙娣姒宗族
所以推先肅事舅姑閨門由其作訓將以鷓駉並驚
常接影於仙樓不意龍劍雙沉竟連形於寶匣以垂
拱四年九月廿七日終於長壽里第春秋卅有六粵
以其年十一月十七日合葬于終南山榭梓谷口隋
信行禪師林側倍大父錄事參軍之舊塋由夙志也

惟君器周大雅德備中和敏殫衆藝好兼靈迹牟子
博之異錄動息會其情虞孝敬之奇記俯仰該其術
黃金積金鎮寫真容白玉成田併開精舍夫人亦凝
心貝葉屬思曇花幼彰龍女之功長契勝鬘之德婉
茲嘉偶咸借慶於一乘俾彼好仇並歸神於八正其
子景先等以爲形資業起業立則形存化以緣生緣
亡則化息履霜增感豈若奉於遺音聞雷警慕固可
說於眞侶式崇寶構虔考勝因寄篆刻於幽庭庶飛
芳於奪里其詞曰
霸秦支子始國于梁帝堯景胄必復其唐易代載德
繼軌傳芳雅符秦晉信叶潘楊其於惟君子夙承家

慶顯允夫人早標門令笙簧其德黼藻其性問望備
隆容工兼盛其身由業立果乃因成共資有相並證
無生八正凝想七覺馳情德踰善德名蓋淨名其積
善方融輔仁無准始驚炭折俄看薪盡悲哉則豹騎
連翔痛矣則螭軒接軼門庭兮簫索墟落兮淒緊四
哀哀鞠子感感遺孤共詳勝地式奉先墓構曾臺於
翠阜刻貞石於黃壚山山兮塔往往兮真徒五
四品孫義陽朱賓撰文五品孫榮陽鄭莊書
大唐故右虞候副率檢校左領軍衛將軍上柱
國乙速孤府君碑銘并序 唐苗神客
大地之大德曰生聖人之大寶曰位生不可以無宰

侯有道以存之位不可以無寄侯有德以尊之故荆
極剖天張維闢寓大君有作俯而乘雲多士聿
興仰登山而捧日可久可大闡洪業於非常立德立
功垂大名於不朽存而為一時之傑歿而為百代之
英爰有異人今可得而聞矣公諱神慶字昭祐其先
王氏太原人也昔房以天戈耀象六英聞鳳舞之
祥后奔以星袂興農萬里厝鸞歌之域帝圖克峻王
道攸歸周德方隆翦商以光其業齊功可遂敗狄而
有其勲官族著乎天下統緒傾乎海內五代祖顯後
魏拜驃騎大將軍偉德挺生稟嵩岱之精魄洪川派
別洩江海之波瀾倚拔千仞盤紆九野遂賜姓為乙

速孤氏始為京兆醴泉人焉。有命承家，代功居寵。然後以周畿委輅，奉春異鍾鼎之門。漢殿乘軒，田秋匪珪璋之操。言其榮闕，故無得而傳之。曾祖貴，齊右衛大將軍，儀同三司使，持節都督岐州諸軍事。岐州刺史周上開府儀同三司，肯附大夫，隨河州諸軍事。河州刺史，河州摠管，太子右庶子，和仁郡開國公。祖安，齊前鋒都督，周右武侯，右六府驃騎將軍，開府儀同三司使，持節荊州諸軍事，荊州刺史，隨益州都督。襲封和仁郡開國公，拜前拜後，惟昭惟穆，咸以忠貞之操，並資文武之才。終始一心，雖百君而每合，出入三代，居八命而逾隆。父晟，皇朝上開府右武侯，右廿府

左車騎將軍，轉驃騎將軍，令緒逾崇，高門克大。岳靈鳳德，紹賢哲以相趨，河日龜文，識公侯而繼出。公山資海授，星傑雷英，跨俗騰彩，驚時駭瞩。雖仲連飛兔，追日電以長鳴，而諸葛臥龍，候風雲而戢景。俄屬龍震，高祖神堯皇帝，開天躡步，翼日騰精，偃橫流於九海，蕩洪氛於八極。雲雷憤薄，興於晉水之湄，天地氤蘊，闢於渭川之浹。于時邑居幅裂，豪俊棊分，鵠起逢時之心，寰中既擾，鳥止于誰之室。寓內攸瞻，公乃蓄悟井之深幾，載驅驪鼻，知躍泉之秘蹟。言訪龍田，獄訟歸禹，不忘於寤寐。歌舞迎周，獨斷於襟抱。以義

之始乃奉見於涇陽初蒙恩命預參秦府從平京邑授通議大夫賜物六十段戎章克峻雖築勳而既重國圖伊始以門胄而方榮乃取祖萇州府君之資任右親衛于時雖地開金策翦鶻甸而斯安而池阻玉華亂雞津而未靜公於是奉陪八技薄伐三川從討王充破青城堡賜物一百段并袍衫牛等加勳大將軍武德元年又征薛舉二年復破武周神兵四舉每推亡於後服英圖百勝必買勇於先登時宋金剛尚憑地險更勞天伐公乃因機有捷燭雲火之高輝應變無方刊風灰之遠陣平寇之後蒙賜馬及金鞞綵物百段王充以巨猾窺壘假位號於成周建德以大

盜因時竊仁義於全趙恃連雞之援以阻危邦託刑馬之盟方為與國太宗乃韜龍豹旅貔貅黃鉞排天朱旗斷霧涉洛川而憤角震嵩巖而疊鼓王充以迭食為命不移蚩魃之心建德以弱甲相依無舛螳螂之衛公乃懷竒請奮受命長驅破王充千金堡并從擒建德預軒勝於元苻奉堯績於丹浦燕趙俄獲蚌為脯而無遺虞虢終亡馬服輿而不失加勳柱國賜物二百段劉黑闥擁銅馬之餘孽氣蘊圖南阻金鳳之長川兵雄趙北公乃從平清漳洛水二因遂俘之授上柱國賜并馬等綵物一百五十段粵以超時之効恒當不次之恩滿寵受田殊非異賞

李忠錫馬遂多慙色尋又從破除員朗復著奇勳既而聖情載洽念功勞特蒙賜用表深榮太宗以雲入戶未改唐侯之爵白水開錢猶踐蕭王之號秦王府妙資左右公以良家首辟令長上仍賜大袍既而飛鷲侵長虹竭井雖域中四大正西北之傾維而天下一家有東南之反氣太宗乃殄茲方命殲厥流言推大義以襲行至公而克翦公以九年六月四日載靜奸回因而侍衛十旬不出既而汾陽脫屣代邨承祧高鳥盡而藏弓歸獸存而去戰公乃方從挾策且欣藜矢結墳籍而為畧驅禮義以為禽然以七德攸歸五營斯佇方始執鞭之任式隆初簣

之基以貞觀五年授右衛勳衛長上六年七年賜絹一百疋八年授右勳衛校尉公以懷才樂道緯武經文學而時習顛沛必於函丈功成不居終始存乎退尺每策勳而命賞常後已而先人所以幽谷非遷望喬木而韜響澠池徒奮坐大樹而銷聲雖薄遊之志每深而厚祿之期終及十年蒙授游擊將軍守左領軍長春府別將仍於永豐倉留守佳兵七萃左帶皇畿敖庾千箱傍臨陝服正壘壁其斯重瞻海陵其已陋聿兼其任隆寄存焉十二年以琬極西傾玉鸞東警皇輿帝阜肅龍駕於風雲天動神行揚鳳旗於日月董司戎禁載佇忠賢車駕自東

都還京乃勅公檢校右衛勳上府郎將十七年以震
宮養德乾心佇乃詔曰公官人志懷強濟計畧
沈遠勞効著於戎旅恪勤宣於階闈宜加榮擢周衛
儲闈可守太子右衛率府勳衛郎將於是青闈振景
絳地增暉招搖之桂連芳共蒼琅之竹比節同
十九年馬邑僇職無踰於驟山之義龍顏憑怒有事
於遼水之陽驚雷輻於碣石洗天兵於海島時高宗
天皇大帝銅樓毓粹玉裕流溫雖義在懸弓宜扈於
擒縱而時方主鬯實資於監撫乃州留守命公
等奉儲闈廿年丁驃騎府君憂去職遐輟趨巷偏
悲陟岵絕漿九日已摧唐頌之心茹痛三年每泣高

柴之血廿三年詔授太子右衛率府翊衛郎將犀鈎
在飾鶴登榮抑禮援琴仍奉樂風之韻踰暮改燧
更承重日之輝既而龍躍在天正銀題於紫極鴻飛
漸陸振玉羽於霄高宗即位之後授右衛中郎將
永徽三年除守右驍衛翊衛中郎將張奐坐帷奮雄
邊之遠畧馬卿建節馳喻蜀之高文才宦雙美括囊
千載五年詔守太子右虞候副率尋加兼太子右虞
候副率徐邈授經之彥師表攸存卞敦良將之才閑
邪是屬公之授也斯實兼焉俄屬六麟徐駕御西京
之霧雨五牛遐拂俯東洛之風煙鈎陳旣委英賢是
賴駕幸東都之日檢校左領軍衛將軍尋又駕幸

衛將軍仍知六閑馬事温驪籜景歎於雪谷瑞
 生風銜珠耀於井職無不理帝有嘉焉俄又兼
 太子右衛率系惟秩寔茲以建功
 茂仲以主門興績瞻言故實英尚斯途公以儔之則
 為優矣方冀有仁必壽有壽必隆而位未極於鈞璜
 問望周之浦齒不延於練玉遽頽觀魯之峯以顯
 慶五年八月廿四日遘疾於
 第春秋六十有二晁旒興悼哀榮兼極勅書垂慰
 贈贈逾隆詔問嗣子行儼等并賜物二百段粵以龍
 朔元年歲次癸亥二月戊午朔十九日異時金石堂

尾云癸亥乃龍朔三年非元年也又以通鑑目錄考
 之龍朔元年二月丙寅朔三年二月乙酉朔俱非戊
 午朔碑版之文所紀年月宜得其真而祇悟如
 此殊不可解然此碑決非後人所能偽作也永厝
 於雍州醴泉縣履中川以從先禮也惟公降象辰
 緯誕靈川岳德光寶璧舒白氣以成虹才苞利器橫
 紫氛而射斗昔在髫初即踰常類嶷然殊狀如旭日
 之吐青山湛乎深識若明月之含碧海克岐日就至
 性天成教以義方則行之靡失趨而有訓則奉以無
 違承顏必當於隱犯知年每形於喜懼不愆于德瞻
 梓無以措其微未嘗有過折捶無以申其罰泊乎歷
 丁艱疚殆不勝喪在驃騎府君之憂公時已班隆貴
 屢將毀滅痛深朝野于時乃有巢鷓乳于倚廬觀聽

嗟古今攸絕豈止許攸永慕栖鵲於虛檐丁密窮哀翔鳧於沼若斯而已矣加以友于成性愛為懷共駕無睽屢極鍾輿之同衾有慰每追姜室之歡兄弟數人公為其長居上斯睦撫下以仁鞞增映怡怡可樂其後五門將闢三荆遽慘公乃責深自箠悲共氣而無終訓切在原泣分形而有異雖同胞竟阻王脩之喻罕遵而推產不干卜式之資未給公以鼎貴餘業財踰巨萬一無所取咸以讓焉遐邇嗟伏宗姻駭歎公以幼承教義早聞詩禮德思潤已學尚專門俄屈有隨蕩覆生人殄喪鄙書劍而事干戈弃俎豆而脩軍旅故得藝殫弧矢精極韜鈴戟

枝揚菜窮取睽之妙金匱玉堂盡殫戎之術所以革車每次大憇斯殲慮靡遺策兵無挫銳非以賞而邀利以功而自伐然則因時命律積稔論兵受而莫違當厚惠而居百夫之長推而不有委榮名而辭万户之侯卓矣高蹤魯連豈唯於蹈海安乎卑位曷藉遂勞於執戟大雅君子斯之謂焉子國子明經高第朝請大夫行綿州司馬行儼遠將軍守岐陽府長上折衝行均游擊將軍守甘泉府左果毅都尉行方等或傳經綜業或良弓嗣美誠在孝而斯勇寔致果而為雄仁者安仁心無昧於觀行將門有將理不差於必復既而匪莪嬰酷悴柏纏哀攀蠹索而增慕循

鑿楹而載感於是乃與昆季聚族興言以爲陵谷難
恃風猷易絕雲臺入畫莫究遺芳天祿藏書方成蠹
簡欲垂不刊之跡必存無媿之詞於是爰勒他山用
旌斯烈無使波空渤澥識墮淚於千齡麓徒琅琊傳
受辛於萬古其詞曰
立功立德惟武惟文銘戈著範勒鼎昭勳名懸日月
氣凜風雲誰其克紹卓矣夫君緒派伊笙望隆淮筮
肇錫宦族卽榮昌袞袞服有輝旗章靡替明明斯謀
高門是繼英英亮狀灼灼瑰竒不憊于道無忒其儀
光含巨闕彩振長離公山比驥呂望非彪運屬時屯
道參人傑鵬圖鳳舉雲迴風烈濟水秦亡登山趙滅

功成百勝途夷九折已建宏勳俄膺懋寵期門甫陟
羽林初奉帝庾斯衛儲兵載擁寓省才高司階位重
官連四率望越五營聲芳漢將氣表周楨未登台室
遽掩佳城哀纏國寶痛結人英樹慘王哀松凋許泣
九泉長送百身何及鶴兆方兼烏墳永戢山秋月思
野寒風急傳鈞令緒待漏英才蘭期奄隔楸思俄開
圖芳隧路紀德泉臺九原徽烈千古風埃
大
唐
二年歲次庚寅二月戊申朔十九日景寅立朝
散大夫著作郎文館學士兼修國史上柱國濟
南縣開國男苗神客撰淨普寺釋行滿書
漫漶舊體泉志已云存二千五百餘字今據舊拓
本書之十得八九勝于王氏萃編所載爲多矣

大周無上孝明高皇后碑銘并唐武三思

思臣聞一儀合德中黃承太紫之庭兩曜齊明玉兔儷
金烏之象是以九霄高映○星躔垂婺女之精十野傍
羅嬌水叶娥皇之德亦有西陵美族■軒帝之宮
南土嘉媒入娉夏王之幄其後大任端一■即創文基
大姒勤勞還開武運故知皇三事業咸資坤肅字載之
功帝五風謠必藉陰靈之化無上孝明高皇后宏農
仙掌字人也出自有周蓋唐叔虞之後原夫赤鳥
流火丹雀銜書爾初開夢梓之祥旋茂翦桐之業自
唐郊徙邑晉野裁封即胙土而有家啓禎符而得姓
周則志為大將承九代之餘資秦則款為上卿居七

城之重任豈直十至丹轂金莩鳥弈於都畿四代白
環玉緒蟬聯於海縣子雲博識吐鳳摛詞伯起高材
銜鱣龔祉誕聖聖不墜降靈相屬神基與紫嶽爭高
仙派共黃河俱遠所以山隆鐘鼎壑地積衣冠五公
則異代相傳八子則殊年閔出詳諸國史可畧
而言曾祖諱定後魏都督歷新興太原二郡太守并
州刺史晉昌穆侯宏材卓犖峻局深沈丹山有象○日
之彩綠塋見遺風之步褰帷按俗風行馭竹之郊露
冕臨至化偃焚林之阜豈直鄧攸罷郡深歎雞鳴劉寵
辭官方憂犬吠祖諱紹後魏征西將軍金紫光祿大
夫兼通直散騎常侍驃騎大將軍周開府儀同三司

封儻城郡公。鄜幽燕三州刺史。贈使持節大將軍。成文扶鄧洮五州諸軍事。成州刺史。謚曰信。聲飛漸陸。響逸鳴臯。器重南金。材橫東箭。謀深八陣。勇冠三軍。既隆投石之勳。果踐銜珠之秩。加以金龜結紐。銅虎分符。轉扇揚風。停車待雨。童兒結要。無欺一之。期親友論刑。自得二之。詠父鄭恭王諱達。周內史中大夫。隨開府儀同三司。黃門內史。吏部刑部二侍郎。尚書左右丞。趙郡二州刺史。工部吏部二尚書。上言營東都大監。將作大匠。武衛將軍。軍左光祿大夫。遂恭公。贈吏部尚書。唐贈尚書左僕射。垂拱二。封鄭王。食邑一萬戶。依舊謚曰恭。卽雍州牧司徒觀。

德王之季弟也。量包江海。氣逸煙霄。文則呂氏春秋。武則孫吳兵法。箕裘代襲。鏘鏘萬石之君。禮樂基身。翼翼千金之子。鸞迴玉札。鴈落瑠弓。激水張鱗。遙浮渤海。搏風理翰。直上扶搖。累踐崇階。頻昇顯秩。鬻鞬北闕。位摠貔貅。曳履南宮。聲高鷓鷯。貂冠入侍。氣應連珠。隼旆分班。榮參執玉。加以累仁。鍾趾積德。延祥四履。開封寵及九泉之路。千乘禮恩。覃萬古之前。棠棣相輝。鵲鴿交映。劉家兩驥。譽滿寰中。荀氏八龍。名高海內。通門向術。冠蓋成陰。甲第當衢。歌鐘就列。伏惟無上孝明高皇后。資靈匪朝。魄毓粹。宮承茂祉。於瑤筐降仙儀。於金屋聲馳。卅歲潛流夢之祥。

譽表笄率暗積捫之貺蘭襟散馥蕙問揚翹懿則
重於邦家柔儀冠於今昔忠圖孝範授翠竹而凌霜
媛德嬪容引青松而冒雪禮枝合秀藻七誠於情田
行葉分芳籠九師於性府徽猷內湛韶姿外發懸明
鏡於積水之間振清飆於長松之上貞規漢遠亮節
秋高翠縷紅纁從來未重龍梭鳳杼本自多輕簡素
鄙鞏繡之工靜默尚韋編之道明詩習禮豈唯秋菊
之銘閱史披圖○止春椒之頌學標而縱開道德之
清關業契生知入文章之妙境曾於方寸具寫千言
摠遊霧於毫端窮偃波於筆杪芝英雲氣入魏帳而
分輝龍爪魚形映張池而散彩嘗題一簡密記貞心

置以緘滕藏之屋壁云當使惡無聞於九族善有布
於四方指此立身期之必遂後因修宅匠者得之恭
王見而歎曰此隆家之女矣昔者書堂欲壞唯聞絲
竹之音劍匣將開空覩蛟龍之氣未有仁心暗徹睿
德冥通橫宇宙而無違滿乾坤而自應若乃行該壑
義孝極而經親枕席而忘疲候晨昏而靡倦及乎風
枝不靜露蓼含■哀哉履厚壑而無追仰曾穹而莫
報思欲托三乘之妙果憑五演之○宗永奉嚴親長
栖雅志昔隨季喪亂海內沸騰伏鱷垂而風塵暗起
羣龍戰野旗鼓潛張白騎於是爭馳青犢由之競擾
蚩尤則餐沙食石項羽則索鐵申鉤赤眉探盆子之

籌黃巾聚丙師之米夫三才合契唯神膺大寶之名
六位乘時惟璧運洪鑪之德唐高祖神堯皇帝材雄
鵠起業峻龍飛用丹辰而靈至將朱旗而撥亂丙綱
既紐竟收龍鳳之圖壑角咸清遂翦豺狼之毒無上
孝明高皇帝觀時有作應運而生先知赤伏之言預
識黃○之兆功深坐樹績茂披荆負伊鼎而陳謀入
張幃而建策龍鈐獨運當赤壑之三千獸節長駟偶
皇丙之百六息崑山之巨燎並藉中權定滄海之橫
流咸資上畧志同魚水契若鹽梅如魏武之得荀攸
似漢光之逢鄧禹雖英圖盛烈昭鶴鼎於高門而闔
則嬪風闕魚軒於中饋高祖神堯皇帝位膺元首任

切股肱利涉大川寄隆舟楫式崇勲舊為結潘楊酬
功草昧之時賞效雲雷之乙高后以孝誠純至雅操
虛沖拒縟禮於移丙誓閑襟於函壑六塵不染孤標
水上之花四諦方披獨晤○中之匪泊乎鳳凰開繇
猶堅匪席之心烏鶴成橋果迫如綸之命於是使桂
陽公主為婚主禮娉所須並令官給既而三○叶兆
百兩邀歡與松蘿而比茂諧琴瑟而流響風聞少女
襲蘭蕙而馳芬匪幌仙娥韻珩璜而動步光生綺殿
比桃李而增鮮影發春樓視雲霞而掩色八紘欽其
雅躅四海挹其鴻徽猶羽翼之宗鸞鳳風雲之隨龍
虎者矣廟見斯畢卽拜應罔夫正從班列也于時帝

圖肇建王業。圖基三戶亡秦。覺風塵之始定。四門闢
舜。識雷雨之將調。而無闕。之祇。峯息崩山之禍。主
上方勤庶政。屬想羣黎。將貽共理之憂。式廣求賢之
務。無上孝明高皇帝。以勲兼竹帛。義重金蘭。備歷文
武。昭昇內外。三踐八元之位。四臨九百之途。中臺飛署
劍之榮。南服摠班條之任。高后以業光圖。大道叶墳
篋。欲啓仁明。定具儉助。是以量如江海。令未發而風
移。化穆荆衡。澤將流而玉悅。呼鷹臺下。尚隔去思。抵
鵲巖前。始歌來晚。俄而高祖晏駕。瞻脫屣而無留。太
祖崩號。奉遺弓而積慕。沈綿遠軫。終無就。之期。痼
疾遄淹。忽切乘。之豐。高后哀深。杞塚誓切。柏舟悲

一劍之先沈。怨雙桐之半死。昔時寶鏡。愴對孤鸞。舊
② 瑤琴。悲聞獨鶴。銜窻茹痛。撫總帳而增號。弔影傷
魂。踐孀閨而凝慕。方祈淨業。敬托良緣。憑慧炬於幽
途。艤慈舟於覺海。於是心持寶偈。手寫金言。字落貫
花。詞分半匣。龍藏豈及。象頁難勝。將佛。而長懸共
慈燈而不滅。及龍旌首次。屣紉遵途。永惟憑附之誠。
願託丘榛之側。方冀鴛栖梓樹。近接埏庭。鶴舞松枝。
傍依遂路。特以壘上。率居膝下。愛切掌中。理藉劬勞。
方資顧復。宣和諭善。屢積葭灰。就匣將頻。移柘火
至永徽。六季。壘上母儀。萬因。而紅位六宮。將開練石
之基。乃遂頽沙之祉。大帝以西京命賞。平原之秩未

東漢崇恩新野之封猶福於是廣流元霈大啓黃
扉稽石窳之遺塵裂寶符之氣昂以其季十一匝時
拜代因夫至食湯沐邑一千戶品第第一位在王公
母妻之上魚軒水鷺颺輕影於龍池暈服霞明下鮮
文於鳳掖榮由德被位匪恩昇驟應嘉名徒昭洪澤
以顯慶五季十匝轉拜榮因夫至尋改封鄧因夫至
自家疏槐里門荷耜庭累沐殊輝頻膺茂典南鄰夜
靜奏鐘磬於高臺北里晨通列笙竽於廣榭門有躡
珠之客家豐饌玉之廚恒處逸而思勞每將昇而必
降綠墀青瑣特忿王根火布金地深非梁冀謙撝之
美萬因仰而知勸端潔之風九圍欽而取則智周寰

宇識洞古今思所以匡因庇至濟時執物嘉謨讜說
屢發於神襟厚利豐功頻彰於帝念奏便削蒙至莫
能知每以孔光祕言合爲忠之道山濤密啓得事而
於覆繭至若緣情體物屬事比辭取之以義方先之
以風化清詞海富緝藻雲繁凡所著述皆成典詞其
動也方其靜也直其恩也若春雨之流津其威也若
秋霜之應節接上以禮逮下以仁君子感其德小至
歡其惠而機獨轉靈臺迴燭虛鑒與②匝齊明神理
共陰陽比奧洋洋乎不可得而稱也旣而離宮霧闌
遙橫壑乳之山別館○開上戴而眉之宿甘泉避暑

方陪萬乘之遊景福追涼更扈六龍之駕不謂災纏
霧露痲積膏肓丹辰凝慈召名醫而接軫紫霄流渥
下珍藥而相望玉金徒煎竟乏長生之術金丹莫就
終無駐壽之期咸亨元季八區二②崩於九成宮之
山第春秋九十有二墜上以身齊霄極禮闕晨昏戀
隔九重望長筵而下泣心馳五起瞻厚縵而啣悲大
帝慮不勝哀祕茲凶問苴筵欲對仍流不次之恩菜
服將臨更下非常之澤仍改封衛瓘夫至以論望上
之憂懸也后疾將大漸時落高春雅志無昏神情不
撓影隨燈滅自此長辭魂逐香銷終無蹇反以爲合
葬非古禮貴從宜將追罔極之慈願在先塋之側塋

上奉遵遺旨無忝徽音割同穴之芳規就循陔之懿
躅卽以其季庚午閏九匝辛丑朔廿一②辛酉遷座
於雍州咸陽縣之洪瀆原鄭恭王舊塋之左禮也尔
其郊原垓北林薄阡眠秦塋關河迴接寶雞之野漢
家墳隴平依金狄之川松檟森沈何季烏住風煙蕭
索幾代至亡於是凝恨九陌廢朝三②空山露泣痛
結飛行曠野雲愁悲躔草樹乃下制贈魯瓘大夫至
謚曰忠烈仍令司刑太常伯盧承慶攝同文正卿充
監護大使右肅機皇甫公義等爲副賜東園祕器每
事官供務從優厚仍令西臺侍郎道瓘公戴至德持
節弔祭京官文武九品以上及諸親命婦並赴宅弔

哭仍送至渭橋葬事並依王禮給班劍四十庄羽葆
鼓吹儀仗送至墓所往還官爲立碑親紉銜禮壘上
因心轉切錫類方宏希申莫大之懷冀展飾終之請
烏墳欲列思增茅土之儀鶴壙將崇願廣山河之誓
遂得五雲飛彩墜仙液於松塋十迴光被增輝于
蒿里乃下制贈太原郡王妃餘並如故所司備禮冊
命大帝親御橫門開軒悲哭紫宸哀慟黃屋淒涼而
壘爲之寢光煙雲由其輟色壘上以幽明永隔配帖
長辭終無再見之因鎮結千秋之恨奔曦已遠薦霜
董而無乘逝水難追饋水魚而未也又以嚴規早墜
遠卜厝於鄉墳慈蔭重傾近陪親於京壙陵塋眇隔

長懸兩壘之悲關塞遙分每切百身之痛遂命大使
備法物自昊陵迎魂歸於順陵焉遊冠遠降墜鳥遙
遷方移沛邑之魂更啓橋山之域白雲朝起乍伴龍
輜明匝宵懸時低廡衛文明元季壘上臨朝其季九
匝追尊先妃曰魏王妃食邑一萬戶實封加滿五千
戶改咸陽園寢曰順義陵大名所啓奧壤○分古樹
捎雲近對黑龍之水荒墳映匝傍隣丹鳳之城徽號
旣崇園陵齋廣屬以圖書河洛龜負鳳銜窓闥方圓
雲攢霧矯合宮重屋旣布政而嚴禮玉輦金輿具巡
河而拜洛永昌元季追尊先妃曰忠孝太后旣而謳
歌允集獄訟知歸而垂革命之符壘涌受終之錄元

珪錫禹還逢揖讓之季黑玉歸商卽啓休明之運九
莖仙草依漢殿而抽芳五色祥雲繞軒宮而布彩下
從至望上應而心乘寶位於通三建瑤圖於得一黃
琮蒼璧祀峯郊而復廟重簷宗文祖武鴻名肇創光
鳳闈於幽泉茂禮將加飾鸞圍於長夜而穠報元垂
追尊曰孝明高皇后陵曰順陵復以祥分貝葉瑞演
龍花金容開十壑之圖玉相告三空之議龍軒黯黯
俄爲兜率之而鳳閣峇峇忽似須彌之座金輪旣轉
玉鏡方懸式詮無上之文齋顯崇親之義長壽二季
后位之上又加無上兩字尋又下制改順陵曰望鳳
臺東京故事西漢遺塵封樹空存追崇未廣豈若宸

襟鎮結長懷露序之哀睿念恒纏永積霜曼之慕遙
瞻鳳野式建嘉名遠望鶉郊長懸美稱且夫功成翼
贊尚畫雲臺勳擅勳庸猶題麟閣況乎俱而茂德貫
匪殊禎垂母則於寰區導嬪風於邦因豈可使炎涼
暗積陵谷潛移唯栽舞鶴之松不刻盤龍之石壁上
凝懷萬化長想千齡恐壑軸之西迴懼而關之北轉
方圖琬琰式降絲綸永嗟仙鶴之歌用固靈龜之上
微惠攀輝樹沐潤○潢榮忝綠車職兼青史奉先
追遠恒積慕於丹誠相質披文忽承恩於紫誥是用
恭抽弱思敬述洪猷屑瓦徒勤生金媿妙揮毫奪魄
陳萬一而窮伏紙驚魂辭再三而不獲遂巡拜首

乃作詞云

逸矣上古悠哉厥爾而迴紫府峯轉黃輿陰陽蕩薄
① 匪居諸靈龜負識寶鳳銜書其六位既陳三才乃
立帝皇鬱起后妃更襲蛟電遙凝虹○下入渭涘疏
派塗山是葺其明明高后奕奕輝光白環代鬱丹轂
家昌靈基嶽峻曾派河長捫而集祉裕後開祥其爰
自生育早彰尊貴匪出○流青龍紫氣金屋是貯玉
衣方萃鶯卵非奇雜珠② 異其芝蘭吐葉桃李開花
黃雲白氣夜匪朝霞賢明自負仁孝無加曾香降藥
祕篋飛沙其聰晤而資惠才神與河漢靈匹瀟湘帝
女筆動鸞迴絃調鶴舞滌想金壘壘心寶聚其六仙容

婉婉豔質峩峩○妃恥出匪媛羞過椒花入頌柳絮
縈歌詞峯秀嶽學海馳波其魴鯉成詩鳳凰開兆琴
瑟既合室家斯紹兩鶴齊飛雙龍並繞德行方肅言
容是昭其九圍母則六合嬪風恩流海內化被區中
銀環曉上金珮夜口祥開梓闕位冠椒宮其習禮明
詩披圖閱史漢朝馬鄧周季任如陰化聿宣坤義齋
理貫匪騰瑞驚雷送社其高春忽墜上壽俄蹇金丹
不熟玉釜徒煎黃泉九壘白③ 三而六宮恨積萬囹
哀纏其一寂寞丘壠淒涼原隰畢壘難追終而靡及
菴露晨清秋霜降急伏紙銜悲揮毫灑泣怨壘賢之
同盡感昏明之遞襲紀盛德於豐碑冀神猷兮永立

其一長安二季歲次壬寅金匱區已巳木朔五②癸
 西金建特進太子賓客兼修國史上桂園梁王惠三思
 奉勅撰太子左奉裕率兼檢校安北大都護相王惠
 旦奉勅書此碑明末地震而後遭縣令鑿碎用之
 二至王氏萃編所載祇二石遺文尚存僅十之
 史三至王氏萃編所載祇二石遺文尚存僅十之
 全錄之以補舊編之闕也唐碑錄存內有此種獨為完
 正續見順陵碑甲戌閏月記

續古文苑卷第十七

